

ROMANS
Di Lede a Paul ang gi di
Nohongo Dabu i Rome
Di haga modongoohia:

Di lede a Paul ang gi di Nohongo Dabu i Rome la ne hihi belee hagatogomaalia dono ala hagahidihidi ne bilaan e haga heetugi gi di Nohongo Dabu Rome. Dana bilaan bolo ia engalua dalia nia dama a Christ ala i Rome i lodo tama madagoaa bodobodo, ga nomuli gaa hana gi Spain mai di nadau hagamaamaa. Mee ne hihi di beebaa deenei belee haga modongoohia di hagadonu onia dama a Christ, modi haga hai hegau di hagadonu gidi mouli onia dama a Christ. Di beebaa deenei gu haga honu giidohu dogomaalia gi ana helekai odi Longo Humalia.

I muli taga aloho a Paul ang gi di Nohongo Dabu i Rome, mee ga hagianga gi digaula dana hai dalodalo i digaula. Nomuli, gei mee ga hagiaga nia mee llauehe ilodo dana lede boloo: Di Longo Humalia e haga modongoohia di hai a God e hai nia daangada gii donu labelaa i dono baahi, mai i nadau hagadonu, mai taamada gaa tugi gi di hagaodi. (1.17)

Paul e haganoho di hai deenei. Nia daangada huogodoo o Jew mo digau tuadimee e hai giidonu imua nia hadumada o God, idimaa, digaula huogodoo la ilala di mogobuna odi huaidu. Nia daangada lagaa donu ibaahi

o God idi nadau hagadonu Jesus Christ. Ga nomuli, Paul e hagamodongoohia di mouli hoo ne hidi mai di nadau bunianga gi Christ. Digau ala gu hagadonu a Christ, gu hai mee gi di aumaalia ibaahi o God, ge gu haga dagaloaha gi daha mo di mogobuna o di huaidu mo di made, mai idi Hagataalunga o God. Ilodo di mada e5 gaahana gidi mada e8, Paul e helekai di hadinga o nnaganoho a God, modi mogobuna o di Hagataalunga o God ilodo di mouli onia dama a Christ. Nomuli, Paul e hagiaga dana hagamamaanadu i di hai o digau o Jew mo digau tuadimee ala etau anggilo do di bilaan a God anggi henuailala. Gei mee ga haga lawa ana helekai beenei bolo digau o Jew gu haga de iloo a Jesus, deenei di bilaan ni God e hagamapuni mai nia daangada huogodoo ilodo dono dumaalia ibaahi o Jesus Christ, gei mee e hagadonu bolo digau o Jew ga hagalee haga de langahia Jesus inia madagoaa huogodoo. Malaa, idi hagaodi, Paul ga helekai di mouli onia dama a Christ mo nadau hagaduu aaloho, gei e helekai labelaa di nadau hai hegau gi God, mo nia hegau nia dama a Christ anggi nadau guongo, mo nia hegau in adau mehanga, mo nia heeu nadau mouli humalia mo huaidu. Gei mee ga haga lawa dana lede deenei giana helekai aana mono helekai hagaamu a God.

Di haghonu di beebaa deenei:

Di haga modongoohia mo nia mee llauehe (1.1-17)

Nia daangada huogodoo gi manawa idi haga mouli (1.18–3.20)

Di ala hagamouli a God (3.21–4.25)

Di mouli hoou i baahi o Christ (5.1–8.39)

Israel i lodo di haganohonoho a God (9.1–11.36)

Di hai o di mouli onia dama a Christ (12.1–15.13)

Di hagaodi mo tagaaloho (15.14–16.27)

¹ Mai baahi o Paul, tangada hai hegau a Jesus Christ, tangada agoago hagau ne hilihili go God belee hagadele dono Longo Humalia.

² Di Longo Humalia la ne hagababa i mua loo go God mai i ana soukohp i lodo di Beebaa Dabu.

³ Deenei go di Longo Humalia o dana Dama daane go tadau Dagi Jesus Christ: I dono huaidina, Mee tangada di madawaawa o David.

⁴ I dono mogobuna dabuaahia, dono mouli aga i di made gu haga modongoohia aga bolo Mee go Tama donu a God, e mahi aamua.

⁵ Mai i Mee, gei God gu dugu mai tumaalia gii hai au tangada agoago hagau ni Mee, bolo gi laha mai nia daangada onia henua huogodoo gilodo di mouli hagadonu mo di daudali.

⁶ Goodou ala e noho i Rome, goodou e dau gi digaula, idimaa, God guu gahi goodou belee hai nia daangada ni Jesus Christ.

⁷ Malaa, gei au e hihi adu gi goodou huogodoo ala i Rome, God e aloho i goodou ge ne haga gahi goodou belee hai ana daangada donu.

Tadau Damana go God, tadau Dagi go Jesus Christ, gi dugu adu tumaalia modi noho di aumaalia.

Talodalo danggee

⁸ Matagidagi, gei au e danggee gi dogu God mai i Jesus Christ, i goodou huogodoo, i di godou hagadonu gulongo humalia i nia madagowaa huogodoo i henuailala.

⁹ God la di haga modongoohia bolo agu helekai ala ehelekai iei au le edonu, di God dela e haihegau ginai au aga ilodo dogu manawa hagatau i dagu hagadele di Longo Humalia o dana Dama daane. God e iloo bolo au e langahia goodou

¹⁰ i lodo agu dalodalo i nia madagoaa huogodoo. Au e dangi gi God gi manawa dumaalia, gi haga haingoohia ina au gii mee dagu heetugi adu gi goodou dolomeenei.

¹¹ Idimaa, au e hiihai huoloo bolo au e hanadu gi godou baahi, gii mee au di gowadu gi goodou di maluagina mai baahi di Hagataalunga, e hagamaaloo aga goodou.

¹² Malaa, e hai bolo gidaadou ga hagadau hagamaamaa i tolongo e dahi, dogu hagadonu ga hagamaamaa goodou, ge godou hagadonu ga hagamaamaa au.

¹³ Ogu duaahina nei, au e hiihai bolo goodou gi iloo bolo inia madagoaa elogo, gei au ne haga togotogomaalia belee hanadu e heetugi adu, gei dimaa di mee igolo e haga deaadee dogu hanadu. Au e hiihai e haga huli hoo nia daangada i godou lodo be dagu hai ne hai gi digau tuadimee ala i golo.*

¹⁴ Idimaa, dogu waawa i golo ang gi nia daangada huogodoo, digau ala gu maalama, mo digau

* **1.13:** Acts 19.21

ala e noho ilodo di bouli, digau kabemee, mo digau e de kabemee.

¹⁵ Deelaa ne hidi iei au ga hiihai mahimahi di hagadele di Longo Humalia adu gi goodou ala e noho i Rome.

Di mogobuna o di Longo Humalia

¹⁶ Au e hagadagadagagee huoloo gi di Longo Humalia, idimaa, ma go di mogobuna o God, dela e haga mouli digau huogodoo ala e hagadonu, digau o Jew imua, mo digau tuadimee labelaa.*

¹⁷ Idimaa, di Longo Humalia le e haga modongoohia aga di hai a God e dugu nia daangada gii donu i dono baahi mai i nadau hagadonu, mai taamada gaa tugi gi di hagaodi. Gii hai be di Beebaa Dabu dela e helekai, “Tangada dela e donu i baahi o God, le e mouli mai i dono hagadonu!”*

Nia huaidu o nia daangada

¹⁸ Di hagawelewele o God e modongoohia mai i di langi, e hai baahi ang gi di hala mo di huaidu o nia daangada. Nia hangahaihai huaidu digaula, la gu duuli di tonu gi deemee di modongoohia aga.

¹⁹ God e hagaduadua digaula, idimaa, digaula gu iloo nia mee belee hai ginaadou gi iloo a God, idimaa, God guu lawa di haga modongoohia madammaa gi digaula.

²⁰ Mai taamada di madagoaa God ne hai henu-ailala, gei nia daangada gu gidee madammaa ono mogobuna mo dono dabuaahia e dee odi. Nia

* **1.16:** Mark 8.38 * **1.17:** Habakkuk 2.4

mee aanei le e modongoohia humalia mai i di gili ana mee ala ne hai, malaa, gu deai tumaalia ang gi digaula ai.

²¹ Digaula e iloo a God, gei digaula hagalee hagalaamua a Mee gii tau gi dono aamua, ge hagalee danggee gi Mee. Digaula guu honu inia hagabaubau balumee, guu honu i di bouli dongoeho.*

²² Digaula e helekai bolo ginaadou e kabemee, gei digaula e dadaulia.

²³ Digaula hagalee daumaha ang gi di God mouli, gei e daumaha ang gi nia ada balu god ono mouli ai, be gi nia ada manu mamaangi, be gi nia ada manu dolodolo, be gi nia manu mouli hongo henua mo lodo tai.*

²⁴ Malaa, God gu diiagi nia daangada dadaulia beinei gii bida heia go nadau haihai gulugulua ala ehiihai ginai, mo nia mee haga langaadia dangada i nadau huaidina.

²⁵ Digaula e huli nia donu a God giihai nia tilikai. Gei digaula e daumaha modi hai hegau gi nia mee ne hai go God, ge hagalee daumaha ang gi di God dela ne hai ana mee huogodoo, go Mee dela belee haga hagaamu go nia daangada gaa hana hua beelaa. Amen!

²⁶ Mai i nadau haihai beelaa, God gu diiagi digaula gi heia go nadau haihai haga langaadia. Nia ahina gu hagalee hiihai e hai hoo gi nia daane, e haihai hua di huaidu i nadau mehanga aahina.

²⁷ Nia daane dela gadoo, digaula gu hagalee hiihai gi nia ahina, e hiihai e hai hoo gi nia daane.

* **1.21:** Ephesians 4.17-18 * **1.23:** Deuteronomy 4.16-18

Digaula guu hai di huaidu haga langaadia i nadau mehanga daane. Di hagaodi gi muli, digaula e kae di hagaduadua dela e tau ang gi nadau hai-hai hala.

²⁸ Idimaa nia daangada gu hagalee hiihai e hagamamaanadu di tonu a God, gei God gu dugu ang gi ginaadou nia hagabaubau ihala, ga hidi mai digaula gaa hai nia mee hagalee belee hai.

²⁹ Digaula guu honu i nia haihai huaidu huogodoo, hagagailaa, tee aloho, dubua, maanga dangada, daaligi tangada gii made, heheebagi, haghauaidu digau ala i golo, tamu dangada,

³⁰ mo helekai tilikai e haghauaidu digau ala i golo. Digaula e de hiihai gi God, e buhi, e hagamuumua, e bida hagalaamua ginaadou, nadau hagabaubau e haga damana aga nadau haihai huaidu. Digaula hagalee halalongo ang gi nadau damana mo nadau dinana.

³¹ Digaula nadau modongoochia ai, hagalee daahi nadau hagababa. Digaula hagalee e aloho be e dumaalia gi digau ala i golo.

³² Ma e aha maa digaula gu iloo nia haganoho a God ala e hai boloo, “Nia daangada ala e momouli ilodo di mouli beenei, le emmade,” digaula e haihaihua nia mee huaidu aanei, gei e donu ginai digau ala i golo ma gaa hai nia mee aanei.

2

Di hagi aga a God

¹ Dogu ihoo hagaaloho, goe e hagi aga digau ala i golo? Malaa, e de hilihili be goe koai, tumaalia adu gi di goe ai. Goe e bida haga huaidu goe maa

goe ga hagi aga digaula, gei e hai nia mee ala e hai go digaula.*

² Gidaadou guiloo bolo God e donu i dana hagi aga nia daangada ala e hai beenei.

³ Gei goe, dogu ihoo hagaaloho, goe e hai nia mee aanei, e hagi aga digau ala igolo! Goe e hagamamaanadu bolo goe gaa tanga laa gi daha mo di hagi aga a God?

⁴ Holongo goe e hagabalumee dono dumaalia damanaiee, mo dono aloho mo dono manawa hagakono? Goe emodongoochia dono manawa dumaalia, i Mee dela edagi goe gi huli hoou.

⁵ Gei do manawa hamaaloo gaabida haga damanaiee do hagaduadua idi laangi ma ga gila aga di hagawelewele a God mo dana hagi aga dela e donu.

⁶ Idimaa, God gaa wanga gi tangada nei mo tangada nei di hui dela e tau ang gi ana hegau nogo hai.*

⁷ Hunu daangada e hai nia mee ala e humalia, ge e halahala di madamada, di aamua, mo di mouli hagalee odi, gei God gaa wanga gi digaula di mouli e dee odi.

⁸ Hunu daangada e hagagailaa ge e hagabalumee di mee dela e donu, bolo gii mee di daudali di mee dela hagalee donu, gei God gaa dugu gi hongo digaula dono manawa daamaha mo dono hagawelewele.

⁹ Di hagaduadua mo di haga mmaemmae gaa noho ibaahi digau huogodoo ala e haihai

* **2.1:** Matthew 7.1; Luke 6.37

* **2.6:** Pisalem 62.12; Proverbs 24.12

di huaidu, digau o Jew i mua mo digau tuadimee labelaa.

¹⁰ God gaawanga di madamada, di aamua, mo di aumaalia, gi digau huogodoo ala e haihai di humalia, digau o Jew i mua mo digau tuadimee labelaa.

¹¹ Idimaa, God ehagiaga nia daangada huogodoo gi di hagatau hua e dahi.*

¹² Digau tuadimee hagalee hai mee gi Nnaganoho a Moses. Digaula guihala, guunngala, guhagalee hagiaga go nnaganoho. Digau o Jew ehaim ee gi nnaganoho, malaa, digaula gaahai di huaidu, ehagiaga go nnaganoho.

¹³ Ma hagalee go di hagalongo hua gi nnaganoho dela e hai nia daangada giidonu ibaahi o God, gei mai di nadau haihegau gi nnaganoho aalaa.

¹⁴ Digau tuadimee nadau haganoho ai, gei di nadau hagamaga nnaganoho mai nadau modongoohia iloo, digaula la go nadau haganoho, ma eaha maa digaula le ehagalee hai mee gi Nnaganoho a Moses.

¹⁵ Nia hangaahai digaula e haga modongoohia aga di hagahonu o nnaganoho laguhihi gilodo nadau manawa. Dinaduu iloo di humalia mo di huaidu ehagamodongoohia bolo di mee deenei le edonu, idimaa nadau hagamaanadu ehagahuaidu ginaadou hunu madagoaa, gei hunu madagoaa e duuli digaula.

¹⁶ Malaa, di Longo Humalia dela ehagadele ko au e hai bolo deenei di hai gaahai i di laangi

* **2.11:** Deuteronomy 10.17

deelaa, idi madagoaa a God mai Jesus Christ ga hagi aga nia hagamaanadu hagammuni o digau huogodoo.

Digau o Jew mo Nnaganoho

¹⁷ Gei goe? Goe e hai bolo goe tangada o Jew, gei goe e hagadagadagagee gi nnaganoho, gei e bida hagaamu goe i do buni anga gi God.

¹⁸ Goe gu iloo di mee a God e hiihai bolo goe gi heia, gei gu kabe mai nnaganoho di hilihili di mee dela e donu.

¹⁹ Goe gu donu bolo goe tangada e dagi digau deegida, ge di maalama ni digau ala e noho i lodo di bouli,

²⁰ tangada e aago digau ala e dadaulia, mo tangada agoago ni digau e de kabemee. Goe gu donu bolo ilodo nnaganoho, goe gu hagahonu go di kabemee mo di tonu.

²¹ Goe e aago digau ala i golo, gei goe e aha dela hagalee aago goe? Goe e agoago boloo, “Hudee gaiaa,” gei goe e gaiaa!

²² Gei goe e helekai boloo, “Hudee hai be di manu,” gei goe e hai be di manu! Goe e de hiihai gi nia balu god, gei goe e gaiaa nia mee ilodo nia hale daumaha!

²³ Goe e bida hagaamu goe i nnaganoho a God, gei goe e hagalangaadia a God i dau oho ana haganoho.

²⁴ Di Beebaa Dabu e helekai, “Idimaa go digau o Jew, digau tuadimee e helekai huaidu i God.”*

²⁵ Maa goe ga haga gila aga nnaganoho, gei do sirkumsais ga dono hadinga igolo. Maa goe

* **2.24:** Isaiah 52.5

ga hagalee haga gila aga nnaganoho, goe e hai gadoo be tangada digi sirkumsais.

²⁶ Maa tangada tuadimee dela digi sirkumsais, ga haga gila aga nnaganoho, malaa, God hagalee gaa dugu tangada deenei be tangada dela gu sirkumsais?!

²⁷ Goodou digau o Jew gaa hai digau e hagahuaidu go digau tuadimee, idimaa, goodou e dagadagahi nnaganoho, ma e aha maa ne hihi adu gi goodou ala gu sirkumsais. Gei digau tuadimee le e haga gila aga nnaganoho, ma e aha maa digaula digi sirkumsais nadau huaidina.

²⁸ Koai tangada donu o Jew gu sirkumsais gii donu? Hagalee go tangada Jew dela ne sirkumsais gi di sirkumsais tuaidina modongoohia.

²⁹ Tangada donu o Jew la tangada o Jew i ono lodo, dono manawa la gu sirkumsais, deenei tegau ni di Hagataalunga o God, hagalee tegau ni nnaganoho. Gei tangada beenei, e kae dono hagaamu mai baahi o God, hagalee mai baahi nia daangada.*

3

¹ Malaa digau o Jew le e humalia anggi ginaadou laa hongo digau tuadimee? Be dono dahi-damee i golo go nadau sirkumsais?

² Uaa, inia mee huogodoo. Kaedahi, God gu hagamadagadagee gi digau o Jew bolo gi daahia ana helekai.

³ E hai behee, maa hunu gau i digaula ga hagalee manawa dahi, deenei le e hai bolo God ga hagalee manawa dahi?

* **2.29:** Deuteronomy 30.6

⁴ Gei deesai! God le e donu, ma e aha maa digau dogologo e helekai tilikai. Di Beebaa Dabu e helekai boloo,

“Oo donu gi modongoohia mai i au helekai.

Goe gi aali i dau gabunga.”*

⁵ Malaa e hai beheee? Maa tadau haihai hala le e haga modongoohia aga di tonu o God, gidaadou le e mee di helekai boloo, “God le e hai gee i dana hagaduadua gidaadou”? (Deenei di heeu belee heeu.)

⁶ Gei deesai! Maa God le e hala, Mee e deemee di hagi aga henuailala!

⁷ Maa dogu hai kai tilikai le e haga maaloo aga di madamada o God gi gidee humalia, malaa au e aha dela e hagahuaidu be tangada huaidu?

⁸ Malaa, gidaadou de ga helekai boloo, “Gidaadou gi heia di huaidu, gei di humalia ga gila aga”? Malaa e donu, hunu gau igolo e hagahuaidu dogu ingoo i nadau helekai bolo au e agoago beelaa. Digaula ga hagahalaua, gii tau anga.

Tangada e donu ai

⁹ E hai beheee go gidaadou digau o Jew, gidaadou e mada humalia i digau tuadimee? Hagalee hai beelaa! Au gu haga modongoohia bolo digau o Jew mo digau tuadimee le e hai hua be di mee e dahi i lala di mogobuna o di huaidu.

¹⁰ Di Beebaa Dabu e helekai,

“Tangada e donu ai,*

¹¹ Hagalee tangada e iloo ai, be e daumaha gi God ai.

* **3.4:** Pisalem 51.4 * **3.10:** Pisalem 14.1-3; 53.1-3

12 Nia daangada huogodoo guu huli gi daha mo God.

Digau huogodoo gu ihala.

Deai tangada e hai nia mee donu ai.

13 Nia ngudu digaula e hai be nia daalunga ala gu maahuge.

Nia helekai tilikai e lloomoi i nia holole digaula, nia lee lagalagamaaloo e hai be nia poisin o nia gihaa,

e lloomoi i nadau malau ngudu.*

14 Gei nadau ngudu le e honu i di haga halauwa mmala.*

15 Digaula e limalima di haga mmaemmae mo di dadaaligi nia daangada gii mmade.*

16 Digaula e oho mo di hagahuaudu nia gowaa huogodoo ala e hula ginai.

17 Digaula e de iloo di ala o di aumaalia.

18 Digaula e de iloo di haga madagudia a God.”*

19 Malaa, gidaadou gu iloo bolo di haga honu o nnaganoho la anga hua gi digau ala enoho ilala nnaganoho bolo gi deemee nia daangada di helekai hagaanga, ge gi gaamai henuailala hagateau gi lala di hagi aga a God.

20 Idimaa, tangada e mee di donu i baahi o God ai, mai i dana haga gila aga nnaganoho. Nnaganoho le hai gidaadou gi iloo bolo gidaadou digau gu ihala.*

God e hai nia daangada gii donu i dono baahi

* **3.13:** Pisalem 5.9; 140.3 * **3.14:** Pisalem 10.7 * **3.15:** Isaiah 59.7-8 * **3.18:** Pisalem 36.1 * **3.20:** Pisalem 143.2; Galatians 2.16

²¹ Gei dolomeenei God gu haga modongoohia dana ala e hai nia daangada giidonu i dono baahi, ge hagalee mai nnaganoho. Nnaganoho Moses mo nia Beebaa onia Soukohp le e haga modongoohia hua di maa.

²² God e hai nia daangada gii donu i dono baahi mai i di nadau hagadonu a Jesus Christ. God e hai di mee deenei anggi digau huogodoo ala e hagadonu a Christ, idimaa, nia hai geegee dangada ai.*

²³ Nia daangada huogodoo la guu hai di huaidu, gei digaula huogodoo gu mogowaa loo, gu hagalee tau anga gi di hagamouli a God.

²⁴ Mai tumaalia dehuia o God, digaula huogodoo guu donu i baahi o God mai i Jesus Christ ne hagamehede digaula.

²⁵⁻²⁶ God guuwanga a Mee bolo mai dono made kiskis, Mee guu hai di ala ewwede ai nia hala onia daangada mai i nadau hagadonu a Mee. God ne hai di mee deenei belee haga modongoohia bolo ma ko Ia dela edonu. Imua, gei Mee nogo hagakono, nogo haga de iloo nia huaidu onia daangada, gei dolomeenei, Mee e haga dina loo nia huaidu onia daangada belee haga gila ono donu. Mai i di mee deenei, God e haga modongoohia bolo ma ko Ia dela edonu, gei e hai nia daangada huogodoo ala e hagadonu a Jesus gii donu i dono baahi.

²⁷ Malaa, ma di aha dela e mee di hagaamu go gidaadou? Di mee ai! Ge tadinga di maa le e hai bolo aha? Go tadau haga gila aga nnaganoho? Deeai, ma go tadau hagadonu!

* **3.22:** Galatians 2.16

28 Idimaa, gidaadou gu iloo bolo tangada la ne donu i baahi o God mai i di hagadonu la hua, ge hagalee mai i dono haga gila aga nnaganoho.

29 God la di God hua ni digau o Jew? Mee hagalee di God ni digau tuadimee labelaa? Uaa, Mee di God ni digau tuadimee labelaa.

30 God le e dahi hua. Mee e hai digau o Jew mo digau tuadimee gii donu i dono baahi mai i nadau hagadonu.*

31 Malaa, deenei le hai bolo mai di hagadonu deenei, gidaadou gi kilia gi daha nia haganoho? Deesai, gidaadou hagalee kili gi daha nnaganoho, gidaadou e daahi nia maa.

4

Hagatau gi Abraham

1 Gei gidaadou ga helekai bolo aha i Abraham, tamana o tadau hagadili? Ma di aha ne iloo a mee?

2 Maa mee ne donu i baahi o God i ana mee ala ne hai, gei mee gu hagaamu eia i ana mee ala ne hai, malaa hagalee i mua o God.

3 Di Beebaa Dabu e helekai,
“Abraham ne hagadonu a God,
gei God guu hai a mee gii donu i dono baahi
mai i dono hagadonu.”*

4 Tangada ngalua e kae dono hui, gei di hui o maa la hagalee di wanga dehuia, di hui ne ngalua ginai.

5 Tangada dela hagalee hagadagadagagee gi dono ngalua, gei e hagadagadagagee hua gi dono hagadonu a God dela e haga donu nia daangada ala

* **3.30:** Deuteronomy 6.4; Galatians 3.20 * **4.3:** Genesis 15.6; Galatians 3.6

gu hai hala, deela tangada gaa hila ginai a God, gaa donu i dono baahi.

⁶ Deenei tadinga di haga modongoohia nnelekai a David ne helekai i di maluagina o tangada a God dela e hai bolo e donu i dono baahi, idaha mo dono ngalua,

⁷ “E maluagina go digau ala guu kae tumaalia o nadau ihala i baahi o God, go digau ala gu maahede nadau huaidu!*

⁸ E maluagina go tangada dela hagalee daahi ono hala go Dimaadua!”

⁹ Malaa, di maluagina deenei dela e helekai ai David, la anga hua gi digau ala gu sirkumsais? Deesai, anga labelaa gi digau digi sirkumsais. Idimaa, gimaadou guu dau nia helekai di Bee-baa Dabu e helekai,

“Abraham ne hagadonu a God, gei God guu hai a mee gii donu i dono baahi mai i dono hagadonu.”

¹⁰ Ana hee ne hai ai di mee deenei? I mua Abraham ne sirkumsais, be i muli? I mua, hagalee i muli!

¹¹ Mee ne sirkumsais nomuli, gei dono sirkumsais ne hai dahi ada haga modongoohia bolo idimaa go dono hagadonu, God guu hai a mee gii donu, i mua dono kae di sirkumsais. Deela laa, Abraham guu hai tamana ni digau huogodoo ala e hagadonu a God, mo digau ala guu hai go Mee gii donu, ma e aha maa digaula digi sirkumsais.*

* **4.7:** Pisalem 32.1-2 * **4.11:** Genesis 17.10

¹² Gei mee guu hai labelaa tamana ni digau ala gu sirkumsais, ana dama gu mouli i di mouli hagadonu dela nogo mouli ai tadau damana Abraham i mua dono sirkumsais.

Nia daangada e kae di hagababa a God mai di hagadonu

¹³ God ne hagababa gi Abraham mo dono hagadili bolo Abraham ga hai mee gi henuailala. Dana hagababa ne hai idimaa Abraham dela ne hagadonu, ge guu donu i baahi o God. Mee hagalee ne hai dana hagababa idimaa Abraham ne haga gila nnaganoho.*

¹⁴ Maa di hagababa a God la anga hua gi digau ala e haga gila aga nnaganoho, malaa di hagadonu o tangada la dono hadinga ai, gei di hagababa a God le e balumee hua.*

¹⁵ Nnaganoho e gaamai di hagawelewele o God, gei di gowaa ono haganoho ai, tee hagalongo gi nnaganoho le hagalee.

¹⁶ Di hagababa ne hagamau mai i di hagadonu, belee hai di hagababa gii hai di wanga dehuia a God dela e hagadagadagagee ginai nia hagadili huogodoo o Abraham, hagalee anga hua gi digau ala e haga gila aga nnaganoho, ge anga labelaa gi digau ala e hagadonu be Abraham. Idimaa, Abraham la tamana ni gidaadou huogodoo.*

¹⁷ Di Beebaa Dabu gu helekai,
“Au ne dugu goe
e hai tamana o nia henua e logo.”

* **4.13:** Genesis 17.4-6; 22.17-18; Galatians 3.29 * **4.14:** Galatians 3.18 * **4.16:** Galatians 3.7

Malaa, di hagababa le humalia i mua nnadumada o God dela e hagadonu go Abraham, di God e haga mouli digau mmade, e helekai hua gei nia mee ala nogo hagalee, ga i golo.

¹⁸ Abraham tangada hagadonu gei dono hagadagadagagee igolo, ma e aha dono hagadagadagagee la ono hadinga ai, gei mee guu hai tamana o nia henua e logo. Di Beebaa Dabu e helekai, “Do hagadili ga dogologowaahee be nia heduu.”*

¹⁹ Ono ngadau gu hoo hoo gaa lau, gei di hagadonu o maa e maaloo hua igolo ilodo dono hagamamaanadu i dono huaidina dela gu bagege, mo di hagamamaanadu Sarah dela hagalee huwa.*

²⁰ Di hagadonu o maa digi diagia a mee, gei mee digi manawa lua gi di hagababa a God. Di hagadonu o maa e haga honu a mee gii mahi, gei mee e haga hagaamu a God.

²¹ Gei mee e donu ang gi deia bolo God e hai loo gi haga gila aga dana hagababa dela ne hai.

²² Deelaa di mee a God ne helekai ai bolo Abraham ne donu mai i dono hagadonu.

²³ Telekai bolo mee guu hai tangada e donu, la hagalee ne hihi hua ang gi mee modogoia,

²⁴ ne hihi labelaa mai gi gidaadou ala guu hai digau e donu, go digau ala e hagadonu a Mee dela ne haga mouli aga a Jesus tadau Dagi mai i dono made.

²⁵ God gu dugu ang gi Jesus gii made mai i tadau huaidu, gaa lawa ga haga mouli aga a Mee belee hai gidaadou gii donu i dono baahi.*

* **4.18:** Genesis 15.5

* **4.19:** Genesis 17.17

* **4.25:** Isaiah

5

Guu donu i baahi o God

¹ Gidaadou ala guu donu i baahi o God mai i tatau hagadonu, gidaadou guu noho i di aumaalia i baahi o God mai i tatau Dagi go Jesus Christ.

² Mee ne laha mai gidaadou i tatau hagadonu gi lodo tumaalia o God dela e mouli ai gidaadou. Malaa, gidaadou gitenetene ilodo tatau hagadagadagagee idimaa gidaadou ga hai mee gi di madamada o God!

³ Gidaadou gitenetene labelaa ilodo tatau madagoaa haingadaa, idimaa, gidaadou e iloo bolo di haingadaa e hai gidaadou gii tuu maaloo,

⁴ gei di tuu maaloo la di mee a God dela e hila mai ai gi gidaadou, gei dono hila mai le e hidi ai tatau hagadagadagagee.

⁵ Gei di hagadagadagagee deenei hagalee hai gidaadou gi manawa gee, idimaa, God ne hagahonu dono aloho gi lodo tatau manawa mai i di Hagataalunga Dabu dela ne gaamai gi gidaadou.

⁶ Idimaa, ilodo tatau madagoaa nogo tatau hagamaamaa ai, Christ guu made gi digau huaidu, i di madagoaa ne haga noho go God.

⁷ Di mee e haingadaa dono hai, maa tangada gaa made gi tangada dela e donu. Holongo, tangada i golo e hiihai e made gi tangada humalia.

⁸ Gei God gu haga modongoohia dono aloho damanaiee i gidaadou, idimaa, i di madagoaa gidaadou nogo noho ilodo di huaidu, gei Christ guu made i tatau lohongo!

⁹ Malaa, gidaadou la guu hai digau e donu i baahi o God dolomeenei mai i nia dodo o Christ,

deeneilaa, Mee ga haga dagaloaha gidaadou labelaa gi daha mo di hagawelewele o God!

¹⁰ Gidaadou nogo hai nia hagadaumee ni God i mua, gei dolomeenei gei gidaadou guu hai nia hoo hagaaloho ni Mee mai idi made o dana Dama daane. Dolomeenei gidaadou guu hai nia hoo hagaaloho ni God, ga hagamouli hogi idi mouli o Jesus Christ!

¹¹ Gei hagalee bolo deenei hua: gidaadou guu tenetene gi nia mee a God ne hai mai i tadau Dagi go Jesus Christ, i Mee dela ne hai gidaadou gii hai nia hoo hagaaloho ni God!

Adam mo Christ

¹² Di huaidu ne hanimoi gi henuailala mai i tangada e dahi, ono hala gu gaamai di made. Di hagaodi gi muli, di made guu tale anggi digau huogodoo, idimaa, nia daangada huogodoo la gu ihala.*

¹³ Di huaidu nogo i henuailala i mua nnaganoho ne gaamai. Inia gowaa ono haganoho ai, di huaidu digi tale gi tangada.

¹⁴ Mai di madagoaa Adam gaatugi gidi madagoaa Moses, di made nogo dahi nia daangada huogodoo, dalia digau ala digi hai di huaidu a Adam ne hai i dono de hagalongo gi nnelekai a God.

Adam la di haga modongoohia o tangada dela ga hanimoi maalia.

¹⁵ Gei meemaa dogolua la hagalee hai be di mee e dahi, idimaa, tumaalia o God la hagalee hai be di huaidu o Adam. Gei e donu bolo digau dogologo

* 5.12: Genesis 3.6

guu mmade mai i di huaidu o tangada e dahi. Gei tumaalia dehuia o God le koia damanaiee huoloo, dono wanga dehuia e damanaiee gi nia daangada dogologo mai i tumaalia o tangada e dahi, go Jesus Christ.

¹⁶ E hai geegee huoloo i mehanga tumaalia o God mo di huaidu a tangada e dahi ne hai. I muli di huaidu e dahi ne hai, gei di hagi aga gu gila aga, dela e helekai boloo, "Gu ihala." Gei i muli nia hala ne logowaahee, gei tumaalia dehuia ga gila aga labelaa, e helekai boloo, "Hagalee e hala!"

¹⁷ E donu bolo di huaidu o tangada e dahi ne hidi ai di made ga daamada gaa dagi. Gei e damanaiee go di hai o tangada dela i golo ne hai, deenei go Jesus Christ: Nia daangada huogodoo ala ne kae tumaalia damanaiee, guu donu i dono baahi, gaa dagi i lodo di mouli mai i baahi o Christ.

¹⁸ Malaa, di huaidu e dahi dela ne hagahuaidu nia daangada huogodoo, i di ala la hua, di haihai donu e dahi ga haga mehede nia daangada huogodoo, gaa wanga gi digaula di mouli.

¹⁹ Tee hagalongo o tangada e dahi ne hai nia daangada huogodoo gii hala, gadoo be di hagalongo o tangada e dahi gaa hai nia daangada dogologo gii donu i baahi o God.

²⁰ Nnaganoho ne hai belee haga damana nia haihai huaidu. Di madagoaa di huaidu ga damana mai, gei tumaalia o God la koia ga damana gi nonua.

²¹ Di huaidu e dahi nia daangada gi di made, dela gadoo be tumaalia dehuia o God dela e dahi nia daangada mai i di tonu, e dahi gi lodo di mouli dee odi mai i Jesus Christ, go tadau Dagi.

6

Made gi di huaidu, mouli i baahi o Christ

¹ Malaa, gidaadou la ga helekai bolo aha? Gidaadou gii noho hua i lodo tadau huaidu, gei tumaalia o God la ga damana mai?

² Deeai! Gidaadou ne mmade gidaha modi huaidu, malaa gidaadou e noho i lodo di huaidu behee?

³ E donu goodou gu iloo bolo di madagoaa gidaadou ne babdais buni anga gi Jesus Christ, gidaadou ne babdais buni anga gi lodo dono made.

⁴ Malaa, mai i tadau babdais, gei gidaadou gu buni anga gi dono made mo dono danu. Christ ne mouli aga mai i dono made i di madamada mo nia mahi o dono Damana, bolo gii noho gidaadou labelaa i lodo di mouli hoou.*

⁵ Idimaa gidaadou ala gu buni anga gi Mee i dono made, gidaadou gu buni labelaa gi Mee i dono mouli aga.

⁶ Gidaadou gu modongoohia bolo tadau mouli namua la guu mmade dalia a Jesus Christ i dono made i di loobuu belee daaligi gi daha di mogobuna huaidu i tadau baahi, gei gidaadou gu hagalee hai nia hege ni di huaidu.

⁷ Idimaa, di madagoaa tangada ma gaa made, geia gu dagaloaha gi daha modi mogobuna o di huaidu.

⁸ Maa gidaadou ne madalia a Christ i dono made, gidaadou e hagadonu bolo gidaadou ga mouli aga labelaa dalia a Mee.

* **6.4:** Colossians 2.12

9 Gidaadou gu modongoohia bolo Christ gu haga mouli aga mai i di made, gei Mee hagalee made labelaa. Mee hagalee noho ilala nia mogobuna o di made.

10 Idimaa Mee ne made, di huaidu gu ono mogobuna i hongo o Mee ai, gei dolomeenei Mee e mouli dono mouli buni anga gi God.

11 Malaa dela digodou hagamaanadu bolo goodou digau emmade i baahi di mouli huaidu, gei e mouli i baahi di mouli o God mai i Jesus Christ.

12 Gei goodou hudee duguanga di huaidu gi dagia godou huaidina, gi de daudali nia hiihai huaidu o godou huaidina.

13 Goodou hudee duguanga gi nia manga o godou huaidina giihai di huaidu. Goodou wangaina goodou gi God, be nia daangada ala ne mouli aga idi made anggi di mouli, gei wangaina godou huaidina hagatau gi hai hegau gi di tonu o God.

14 Di huaidu gi hudee daga ina goodou, idimaa goodou hagalee e mouli ilala nnaganoho, goodou e mouli i lala tumaalia o God.

Nia hege ni di tonu

15 Gei gidaadou la ga helekai bolo aha? Gidaadou gaa hai nia huaidu, idimaa, gidaadou hagalee noho ilala nnaganoho, gei e noho ilala tumaalia o God? Deeai!

16 Goodou gu iloo bolo maa goodou ga hai hege ge hagalongo gi dahi dangada, goodou guu hai nia hege ni tangada dela e hagalongo ginai goodou. Goodou ma gaa hai nia hege ni di huaidu, goodou

gaa hai digau e mmade. Gei goodou ma gaa hai nia hege ni di tonu, goodou gaa donu i baahi o God.

17 Gidanggee gi God, idimaa, imua gei goodou nogo hai nia hege ni di huaidu, gei dolomeenei goodou guu hai digau e hagalongo i lodo godou manawa hagatau ang gi di tonu dela gu gidee goodou i lodo nia agoago ala ne kae go goodou.

18 Goodou gu haga maahede gi daha mo di huaidu, guu hai nia hege ni di tonu.

19 (Au e hai hegau gi nia bida helekai haingoohia, idimaa, goodou epaagege godou huaidina.) Imua, gei goodou newanga goodou gii hai nia hege ni di mouli gulugulua mo di huaidu, mo di haga gila aga di manawa huaidu. Gei dolomeenei goodou wanga ina goodou gii hai nia hege ni di tonu gii gila di mouli dabuaahia.

20 I lodo di godou madagoaa nogo hai hege gi di huaidu, goodou nogo maahede gi daha mo di tonu.

21 Ma di humalia aha dela ne gila adu gi goodou i di godou haihai nia mee ala elangaadia ai goodou dolomeenei? Di hagaodi gi muli onia mee aanei, la go di made!

22 Gei dolomeenei, gei goodou gu haga maahede gi daha mo di huaidu, guu hai nia hege ni God, gei di mee dela e kae go goodou la di mouli dela e hagadabu ang gi God, mo di hagaodi gi muli la di mouli dee odi.

23 Idimaa, di hui o di huaidu la go di made, gei di wanga dehuia a God la go di mouli e dee odi, dela i baahi o Jesus Christ, go tadau Dagi.

7

Di ala hagatautau o taga hai lodo

¹ Ogu duaahina nei, goodou gu iloo agu mee ala ga helekai ai, idimaa, goodou gu iloo di hai o nia haganoho. Nnaganoho le e dagi hua nia daangada i di madagoaa dela e mouli ai digaula.

² Deenei dono ala: Di ahina hai lodo e noho i lala taganoho hagamau gi dono lodo i di waalooloo o dono lodo e mouli ai. Maa dono lodo gaa made, gei mee gu mehede gi daha mo taganoho hagamau deela.

³ Malaa, mee gaa lodo gi tuai daane, gei di lodo o maa le e mouli hua igolo, gei mee e haga ingoo bolo di ahina mouli hai be di manu. Maa di lodo o maa la guu made, gei mee gu mehede, hagalee haga ingoo bolo di ahina mouli be di manu maa mee ga hai lodo gi tuai daane labelaa.

⁴ Ogu duaahina nei, deela di hai i godou baahi: I di hai o Nnaganoho Moses, goodou guu mmade labelaa, idimaa, goodou gu hagadaubuni ang gi tuaidina o Christ. Gei dolomeenei, goodou guu hai nia dama ni Mee dela ne haga mouli aga i di made, dela e hai gidaadou gii hai nnegau a God.

⁵ Tadau madagoaa nogo mouli i tadau manawa, gei nia hiihai huaidu ala nogo hagangalungalua go nnaganoho ilodo tadau huaidina, la ne hai gidaadou gii hai nnegau o di made.

⁶ Gei dolomeenei, gidaadou gu maahede gidaha mo nnaganoho, idimaa, gidaadou guu mmade gi nnaganoho dela nogo daahi gidaadou be digau galabudi, gei gidaadou gu hagalee hai hegau gi nnaganoho namua ala

ne hihi, gei gu hai hegau hua gi di ala hoou o di Hagataalunga Dabu.

Nnaganoho mo di huaidu

⁷ Gidaadou ga helekai bolo aha, ma go nnaganoho ala e huaidu? Deesai! Nnaganoho ala ne hai au gi iloo di hai o di huaidu. Maa taganoho digi helekai boloo, “Hudee hagagailaa,” gei au e de iloo di hagagailaa.*

⁸ Malaa, di huaidu dela ne hagangalua aga nia hagadilinga maanadu dumaanga i ogu lodo mai i taganoho. Gei di maa bolo nnaganoho ai, di huaidu la dono hadinga ai.

⁹ Au nogo mouli gidi mouli idaha mo nnaganoho. Di madagoaa taganoho ne gila aga, gei di huaidu gu gila aga labelaa,

¹⁰ gei au guu hai tangada emade. Malaa, taganoho dela belee hai au gi mouli, la ne hai au gii made.

¹¹ Di huaidu ne gidee dono madagoaa humalia mai i taganoho, gu halahalau au, gu daaligi au gii made.*

¹² Malaa, nnaganoho le e dabu, nia helekai o nnaganoho le e dabu, e donu ge e humalia.

¹³ E hai behee? Di mee deenei le e haga modongoohia bolo di mee humalia la guu hai au gii made? Deesai! Di huaidu dela ne hidi ai di maa. Di huaidu ne hai au gii hai tangada emade, i dana haga hai hegau di mee humalia bolo gi modongoohia aga di huaidu. Idimaa, nia helekai o nnaganoho

* **7.7:** Exodus 20.17; Deuteronomy 5.21 * **7.11:** Genesis 3.13

gu haga modongoohia bolo di huaidu la di huaidu damanaiee.

Di hai baahi i lodo nia daangada

¹⁴ Gidaadou gu iloo bolo nnaganoho la mai baahi o God, gei au tangada dangada, guu hui be di hege ang gi di huaidu.

¹⁵ Au e de iloo agu mee ala e hai, idimaa, au hagalee hai nia mee ala e hiihai ginai au, gei au e hai hua go nia mee ala e de hiihai ginai au.*

¹⁶ Idimaa au e hai di mee dela e de hiihai ginai au, le e haga modongoohia bolo au e donu hua bolo nnaganoho le e donu.

¹⁷ Hagalee ko au deenei dela e hai di maa, go di huaidu dela i ogu lodo.

¹⁸ Au e iloo bolo di haihai humalia la hagalee i lodo dogu huaidina dangada. Idimaa, dogu hiihai e hai di mee humalia la i ogu lodo, gei di maa e deemee di hai ko au.

¹⁹ Au hagalee hai di mee humalia belee hai, gei au e hai di mee huaidu, go di mee dela e de hiihai ginai au le e hai koau.

²⁰ Maa au gaa hai di mee dela e de hiihai ginai au belee hai, malaa, hagalee ko au dela ne hai di maa, di huaidu dela i ogu lodo ne hai di maa.

²¹ Malaa, au gu gidee bolo taga noho deenei le e ngalua: Dogu madagoaa dela e hiihai belee hai di humalia, gei di maa go di huaidu hua dela ne hilihili aga ko au.

²² Ogu lodo e tenetene gi nnaganoho a God,

²³ gei au gu gidee tuai haganoho dela e ngalua ilodo dogu huaidina, go taganoho dela

* 7.15: Galatians 5.17

e hai baahi gi taganoho dela e donu ginai agu hagamamaanadu, gei au gu galabudi go taganoho o di huaidu dela e ngalua i dogu huaidina.

²⁴ Au tangada hua e lodo huaidu! Ma koai dela ga haga dagaloaha au gi daha mo tuaidina deenei, dela e dagi au gi lodo di made?

²⁵ Di mee bolo mee anggi God dela e haga gila aga di mee deenei, mai baahi tadau Dagi go Jesus Christ!

Malaa deenei dagu hai: Au e hai hegau gi nnaganoho God i lodo agu hagamamaanadu, gei dogu huaidina dangada e hai hegau gi taganoho o di huaidu.

8

Di mouli i di Hagataalunga Dabu

¹ Digau ala e mouli buni anga gi Jesus Christ la hagalee halauwa,

² idimaa, taganoho o di Hagataalunga Dabu dela e haga mouli gidaadou i tadau buni anga gi Jesus Christ, gu hagamehede au gi daha mo taganoho o di huaidu mo di made.

³ Di mee Nnaganoho Moses ne deemee di hai idimaa tuaidina dangada le e bagege, gei God guu hai di maa. Mee gu hunahuna di huaidu i baahi tuaidina dangada i dana hagau mai dana Dama donu gii hai tuaidina dangada huaidu belee hagamadamma di huaidu.

⁴ God ne hai di mee deenei belee haga gila aga nia helekai donu o nnaganoho i tadau baahi ala e mouli i di Hagataalunga, hagalee mouli i di hi-ihai dangada.

⁵ Digau ala e mouli i nadau hiihai, nadau haga-mamaanadu e dagi go nadau hiihai o naadou. Digau ala e mouli i di Hagataalunga, digaula e dagi go di hiihai o di Hagataalunga Dabu.

⁶ Di hagaodi gi muli o digau ala e dagi go nadau manawa hiihai, la go di made. Di hagaodi gi muli o digau ala e dagi go di Hagataalunga, la go di mouli mo di aumaalia.

⁷ Tangada dela e dagi go dono manawa hiihai oono, guu hai di hagadaumee ni God, idimaa, mee hagalee haga gila aga nnaganoho a God, gei e donu, mee e deemee di haga gila aga nia maa.

⁸ Digau ala e dagi go nadau manawa hiihai o naadou, le e deemee di haga tenetene a God.

⁹ Goodou hagalee dagi go godou manawa hiihai, gei goodou e dagi go di Hagataalunga, maa e donu bolo di Hagataalunga o God le e noho i godou lodo. Maa di Hagataalunga o Christ ga hagalee i baahi tangada, gei mee hagalee di tama ni Christ.

¹⁰ Maa Christ e noho i godou lodo, gei di Hagataalunga Dabu la guu hai di godou mouli,* idimaa, goodou guu donu i baahi o God, ma e aha maa godou huaidina le e mmade i di huaidu.

¹¹ Idimaa, maa di Hagataalunga o God dela ne haga mouli aga a Christ mai i dono made, le e noho i godou lodo, malaa Mee dela ne haga mouli aga a Christ mai i dono made, la ga gowadu labelaa di mouli gi godou huaidina dangada dangada, mai i dono Hagataalunga dela i godou lodo.*

* **8.10:** *gei di Hagataalunga Dabu la guu hai di godou mouli, be godou hagataalunga la gu mouli,* * **8.11:** 1-Corinthians 3.16

¹² Gei deela laa, ogu duaahina nei, tadau hegau i golo belee hai, hagalee belee mouli i di mouli o tadau hiihai.

¹³ Maa goodou e mouli i godou manawa hiihai, gei goodou gaa mmade. Maa goodou ga mouli i di Hagataalunga Dabu, goodou e haga mmade gi daha godou haihai hala, gaa hai digau e mouli.

¹⁴ Idimaa, digau ala e dagi go di Hagataalunga o God, la nia dama ni God.

¹⁵ Di Hagataalunga dela ne gowadu go God gi goodou, e hagalee haga hai hege goodou, gei hagalee hai goodou gi mmaadagu, gei e hai goodou giihai nia dama ni God mai di mahi o di Hagataalunga dela e hai gidaadou gi tangi ang gi God, boloo, “Tamana, dogu Damana!”*

¹⁶ Di Hagataalunga o God e haga puni anga gi tadau hagataalunga e haga modongoohia bolo gidaadou nia dama ni God.

¹⁷ Idimaa gidaadou guuhai nia dama ni Mee, gei gidaadou ga hai mee gi nia mee a Maa nogo benebene ang gi ana dama, gei gidaadou ga madalia a Christ e hai mee labelaa gi di maluagina a God dela ne benebene ang gi Christ. Idimaa, maa gidaadou ga madalia a Christ e hagaduadua, gei gidaadou ga hai mee labelaa gi dono madamada.

Di madamada dagidilaangi

¹⁸ Au e hagamaanadu bolo di hagaduadua dela e tale mai gi gidaadou dolomeenei, la hagalee tau gi di madamada dela ga gila mai gi gidaadou.

* **8.15:** Mark 14.36; Galatians 4.5-7

¹⁹ Nia mee huogodoo ala ne hai go God le e talitali nia dama a God gi kila aga.

²⁰ Nia mee huogodoo ala ne hai go God guu mee hua di maa gi daha, gu deai ono hadinga ai, hagalee mai nadau hiihai, gei mai di hiihai o God bolo ma e hai beelaa, i di hagadagadagagee*

²¹ bolo dahi laangi hua, nia mee ne hai go God ga dagaloaha gi daha mo di mouli hege anggi di made, ga madalia nia dama a God ilodo nadau dagaloaha madamada.

²² Gidaadou gu iloo bolo nia mee ne hai go God le e mmaemmae gaa dae mai gi dangi nei gadoo be di mmae o di ahina ma ga haanau.

²³ Ma hagalee go nia mee ala ne hai e mmaemmae hua, gei gidaadou labelaa ala ne kae di Hagataalunga Dabu matagidagi i tumaalia ibaahi o God, e mmaemmae labelaa tadau lodo i tadau talitali di madagoaa a God magaa hai gidaadou nia dama niaana ge e haga dagaloaha tadau huaidina hagatau.*

²⁴ Ma go tadau hagadagadagagee dela ne haga mouli ai gidaadou. Maa gidaadou e gidee tadau mee ala e hagadagadagagee ginai, gei tadau hagadagadagagee la hagalee di hagadagadagagee e donu. Idimaa, deai tangada e hagadagadagagee gi di mee dela e gidee ia ai!

²⁵ Maa gidaadou ga hagadagadagagee ginia mee ala e de gidee, gei gidaadou e talitali ge hagakono di manawa.

²⁶ Idi ala la hua, di Hagataalunga Dabu e hanimoi e hagamaamaa gidaadou ilodo

* **8.20:** Genesis 3.17-19 * **8.23:** 2-Corinthians 5.2-4

tadau paagege. Idimaa, gidaadou e de iloo di hai dalodalo, gei di Hagataalunga e dalodalo i gidaadou anggi God inia lee ala edeeme di haga modongoohia go nnelekai.

²⁷ Gei God dela egidee ilodo di manawatangada, le iloo di hagamaanadu odi Hagataalunga, idimaa, di Hagataalunga Dabu e dalodalo anggi God i gidaadou i dono hiihai.

²⁸ Gidaadou gu iloo bolo God gaa hai nia mee huogodoo gii kila humalia anggi digau ala e aloho i de Ia, go digau ala ne gahi go Mee gii hai be dono manawa.

²⁹ Digau ala ne hilihili go God, guu hili gi daha go Mee gii hai be dana Dama go Christ, bolo gii hai dana Dama di ulumadua o nia duaahina dogol-ogo.

³⁰ Gei God gaa gahi digau ala ne hili gi daha, gaa hai digaula gii donu i dono baahi, gaa hai digaula gi hai mee gi dono madamada.

Di aloho o God i lodo Jesus Christ

³¹ Gidaadou ga helekai bolo aha ginia mee aanei? Maa God e madalia gidaadou, koai e mee di hai baahi mai gi gidaadou?

³² God digi duulia dana Dama go Jesus Christ gi daha, Mee ne dumaalia mai a Mee gi gidaadou huogodoo belee hai ai tigidaumaha! Malaa e hai behee, Mee hagalee ga gaamai dehuia gi gidaadou nia mee huogodoo labelaa?

³³ Koai dela e haga hala nia daangada a God ne hilihili? God guu lawa di helekai bolo digaula gu hagalee hala!

³⁴ Malaa, koai dela ga hagahuaidu digaula? Hagalee go Jesus Christ dela ne made gei e donu

ga mouli aga, gaa noho i di baahi gau donu o God, e dalodalo ang gi God i gidaadou.

³⁵ Gei di maa koai dela e mee di wwae gidaadou gi daha mo di aloho o Christ? Hagalee go di hagamada, di haingadaa, tadaaligi, di hiigai, di hagalole, di mee haga lliga, be go di made!

³⁶ Idimaa, di Beebaa Dabu e helekai, "Idimaa Kooe, dela gaa noho ai gimaadou i lodo di haingadaa o di made i lodo nia madagoaa huogodoo. Gimaadou e hai gadoo be nia siibi ala ga daaligi gii mmade."*

³⁷ Gei deeai, i lodo nia mee huogodoo aanei, gidaadou guudohu i di aali, mai dono aloho i gidaadou!

³⁸ Au ehagadagadagagee bolo ma deai di mee e mee di wwae gidaadou gi daha mo di aloho o God ai: Hagalee go di made be go di mouli, hagalee go digau di langi be go nia dagi o di langi be go nia mogobuna o di langi, hagalee go di madagoaa dolomeenei be go di madagoaa maalia,

³⁹ hagalee go bahi i nua henuailala be go bahi i lala o henuailala. Deai di mee i lodo ana mee ala ne hai e mee di wwae gidaadou gi daha mo di aloho o God ai, go di aloho dela ne hai mee ginai gidaadou mai tadau Dagi go Jesus Christ.

9

God mo ana daangada

¹ Au ehelakai i di tonu, au di tama ni Christ, au hagalee helekai tilikai. Dogu modongoohia di tonu dela e dagi go di Hagataalunga Dabu

* **8.36:** Pisalem 44.22

e haga modongoohia mai labelaa bolo au hagalee helekai tilikai,

² i dogu helekai bolo dogu manawagee la gu damanaiee, gei di mmae o dogu manawa e dee odi

³ anggi agu daangada donu, gi ugu goneiga donu, mo ugu dodo. Dogu hiihai bolo God ne belee haga halauwa hua au, gi daawa au gi daha mo Christ e haga humalia ugu duaahina ala go ugu gau donu.

⁴ Digaula la nia daangada ni God. Mee ne hai digaula gii hai ana dama, ga hagi anga gi digaula dono madamada, gaa hai dana boloagi gi digaula, gaa wanga gi digaula nnaganoho. Digaula gu daumaha donu, ge digaula gu kae nia hagababa a God.*

⁵ Digaula la nia hagadili ni madau maadua mmaadua. Christ dono huaidina dangada edau anggi nadau hagadili. Gi haga hagaamuina a God go Tagi onia mee huogodoo, gaa hana hua beelaa. Amen.

⁶ Au hagalee helekai bolo di hagababa a God la digi gila, idimaa, hagalee go digau Israel huogodoo la nia daangada ni God.

⁷ Ge hagalee nia daangada huogodoo o di hagadili o Abraham la nia dama ni God. God ne helekai gi Abraham,

“Ma go di hagadili hua o Isaac aalaa go digau e dau.”*

⁸ Gei nia dama ala e haanau mai idaha modi hagababa, la hagalee nia dama ni God. Ma go

* **9.4:** Exodus 4.22 * **9.7:** Genesis 21.12

nia dama ala ne haanau i lodo di hagababa a God, aalaa go nia dama o di hagadili e dau.

⁹ Idimaa, di hagababa a God la ne hai gi nia helekai aanei,

“Dahi madagoaa e tau anga,

gei Au ga hanimoi,

gei Sarah ga haanau dana dama daane.”*

¹⁰ Ge hagalee deenei hua. Nia dama daane Rebecca le e dogolua, di nau damana e dahi dela go di madau damana madua go Isaac.

¹¹⁻¹² God ne helekai gi Rebecca bolo gi gila ai dono manawa i dana hilihili dana dama daane e dahi i meemaa, boloo,

“Tangada madua la ga hai hegau gi tangada duli.”

Nia helekai aanei ne hai i mua di haanau meemaa, ge i mua di nau hai di huaidu be di humalia, gei God ne hai dana hilihili mai dono hiihai gahigahi meemaa, hagalee mai i nau mee ala ne hai.*

¹³ Idimaa, di Beebaa Dabu e helekai,

“Au ne aloho i Jacob,

gei Au ne de hiihai gi Esau.”*

¹⁴ Malaa, gidaadou la ga helekai bolo aha, God le e hai gee? Deeai, hagalee hai gee.

¹⁵ Idimaa, Mee gu helekai ang gi Moses,

“Au e dumaalia gi di ingoo hua tangada dela e hiihai ginai Au,

gei Au e aloho i di ingoo hua tangada

dela e hiihai ginai Au.”*

* **9.9:** Genesis 18.10 * **9.11-12:** Genesis 25.23 * **9.13:** Malachi 1.2-3 * **9.15:** Exodus 33.19

16 Deenei laa, nia mee huogodoo hagalee hai mai i di hiihai be go di hai mee o tangada, gei mai tumaalia o God.

17 Di Beebaa Dabu e helekai bolo God ne helekai gi di king o Egypt boloo,

“Au ne hai goe gii king

belee haga modongoohia ogu mogobuna,

ge hagadele dogu ingoo gi modongoohia

i hongo henuailala hagatau.”*

18 Deelaa laa, God e dumaalia ang gi tangada dela e hiihai ginai Ia, gei e haga hamaaloo tangada dela e hiihai ginai Ia e haga hamaaloo.

Di hagawelewele mo tumaalia o God

19 Tangada i goodou ga helekai mai gi di au, “Ma gaa hai beenei, dehee di hai a God e gidee di hala o tangada? Gei di maa koai dela e mee di hai baahi gi di manawa o God?”

20 Dogu ihoo hagaaloho nei, goe koai dela e helekai hai baahi ang gi God? Di boolo hadu e deemee di heeu gi tangada dela ne hai eia boloo, “Goe e aha dela ne hai au beenei?”*

21 Taane hai boolo ono donu e hai hegau gi nia hagadilinga gelegele, e hai ana boolo elua mai di hagamunga gelegele edahi. Edahi ang gi di madagoaa hagalabagau, ge dahi ennoo mau e hai hegau ai.

22 Malaa e hai bedi hai a God. Mee ne hiihai e haga modongoohia aga dono hagawelewele mo e hai nia daangada gi iloo ono mogobuna. Gei Mee nogo hagakono dono manawa ang gi digau ala

* 9.17: Exodus 9.16 * 9.20: Isaiah 29.16; 45.9

i lala dono hagawelewele, guu hai digau ala belee kili gi daha.

²³ Gei Mee ne hiihai e haga modongoohia aga labelaa dono madamada aamua dela ne dugu mai gi gidaadou ilala dono dumaalia, go gidaadou ala gu hagatogomaalia go Mee e wanga ginai dono madamada.

²⁴ Go gidaadou ala gu haga gahi go Mee, digau o Jew mo digau tuadimee labelaa.

²⁵ Dela gu helekaiiei Mee ilodo di Beebaa Hosea,
 “Nia daangada la hagalee nia daangada ni aagu,
 gei Au ga haga ingoo digaula boloo, ‘Agu daangada’.

Tenua dela digi alohoiei Au,
 gei Au ga haga ingoo digaula boloo,
 ‘Ogu ihoo hagaaloho.’*

²⁶ Gei ilodo hua di gowaa dela ne hai telekai gi digaula boloo,
 ‘Goodou hagalee nia daangada ni aagu,’
 deelaa di gowaa digaula ga haga ingoo boloo,
 ‘Nia dama ni di God Mouli.’”*

²⁷ Gei Isaiah e haga modongoohia digau Israel, boloo,
 “Ma e aha maa digau Israel ga dogologowaahee be nia gelegele tongotai,
 gei digau hua dulii ga hagamouli,

²⁸ idimaa, Dimaadua ga limalima hua
 dana hagi aga digau ala i hongo henuailala.”*

²⁹ Malaa, e hai be nnelekai Isaiah i mua, boloo,
 “Maa nei bolo Dimaadua Aamua Huoloo

* 9.25: Hosea 2.23 * 9.26: Hosea 1.10 * 9.28: Isaiah 10.22-23

digi dugu mai tadau hagdili,
gei gidaadou guu hai gadoo be Sodom mo Gomor-
rah.”*

Israel mo di Longo Humalia

³⁰ Malaa, gidaadou la ga helekai bolo aha? Gi-
daadou ga helekai bolo digau tuadimee hagalee
hagamahi gii donu i baahi o God, gei guu donu mai
i nadau hagadonu a God.

³¹ Gei digau Israel nogo halahala nadau
haganoho bolo gii donu ginaadou i baahi o God,
gei digi gidee ginaadou.

³² Malaa dehee tadinga di mee deenei? Idimaa,
digaula e hagamaanadu bolo ginaadou e mee hua
di donu mai i nadau hangaahai, hagalee go
di hagadonu. Digaula gu tingatinga i di hadu
haga hinga dangada,

³³ dela e helekai ai di Beebaa Dabu,
“Goodou mmada!
Au gaa dugu dagu hadu gi lodo Zion,
e hai di hadu haga hingahinga dangada.
Be koai hua dela e hagadonu a Mee,
geia e hagalee manawa gee.”*

10

¹ Ogu duaahina nei, au e hiihai huoloo aga
i lodo dogu manawa hagatau bolo agu daangada
donu huogodoo gi hagamouli. Au e hagamahi
e dalodalo gi God i digaula!

² Au e mee di haga modongoohia adu gi goodou
bolo digaula gu dogi anggi God. Gei nadau

* 9.29: Isaiah 1.9 * 9.33: Isaiah 28.16

dogi anga la hagalee daudali di kabemee dela e donu.

³ Idimaa, digaula digi iloo di ala dela e hai ginaadou gii donu i baahi o God, e haihai hua nadau huai ala i ginaadou, malaa, digaula digi daudalia di ala a God dela e hai ginaadou gii donu i dono baahi.

⁴ Idimaa, Christ gu haga modongoohia di hagalawa o nnaganoho, gei digau huogodoo ala gu hagadonu la guu hai digau e donu i baahi o God.

Di haga mouli ang gi digau huogodoo

⁵ Deenei di mee Moses ne hihi bolo gii hai nia daangada gii donu i baahi o God i di nadau hagalongo ang gi nnaganoho,
 “Be koai hua dela e hagalongo ge e daudali nnaganoho, geia ga mouli.”*

⁶ Di mee di Beebaa Dabu e haga modongoohia tangada dela e donu i baahi o God mai i dono hagadonu la deenei,
 “Goe hudee heeu adu boloo,
 ‘Ma koai dela gaa hana gi di langi?’ ”
 (belee laha ia a Christ).*

⁷ “Hudee heeu labelaa boloo,
 ‘Ma koai dela gaa hana gi bahi i lala henuailala?’ ”
 (belee laha aga a Christ mai di made).

⁸ Deenei di mee e helekai ai boloo,
 “Nia helekai a God le e hoo hoo adu gi di goe,
 i lodo doo ngudu, i lodo do manawa.”
 Aalaa go nia helekai o di hagadonu ala e agoago go gimaadou.

* **10.5:** Leviticus 18.5 * **10.6:** Deuteronomy 30.12-14

⁹ Maa goe ga haga modongoohia gi doo ngudu bolo Jesus la go Tagi, ga hagadonu i lodo do manawa bolo God ne haga mouli aga a Mee mai di made, gei goe ga hagamouli.

¹⁰ Idimaa, ma go tadau hagadonu dela e hai gidaadou gi donu ibaahi o God, gei tadau haga modongoohia a Mee gi tadau ngudu dela e hai gidaadou gi mouli.

¹¹ Di Beebaa Dabu e helekai boloo,
 “Be koai hua dela ga hagadonu a Mee,
 geia hagalee haga langaadia.”*

¹² Nnelekai aanei la ang gi digau huogodoo, idimaa, di hai geegee i mehanga digau o Jew mo digau tuadimee ai. God e dahi hua, di Tagi ni digaula huogodoo, gei e haga maluagina digau huogodoo ala e tangi ang gi de Ia.

¹³ Di Beebaa Dabu e helekai,
 “Digau ala ma ga tangi anga
 i di ingoo o Dimaadua i di hagamaamaa,
 le e hagamouli.”*

¹⁴ Malaa, digaula e tangi ang gi Mee behee maa ginaadou digi hagadonu? Gei digaula e hagadonu behee maa ginaadou digi longono nia helekai? Gei digaula e longono behee, maa nia helekai la digi agoago ina gi digaula?

¹⁵ Gei nnelekai le e agoago behee maa digau agoago la digi hagau ina gi daha? Di Beebaa Dabu e helekai,
 “E madamada huoloo go di lloomoi o digau
 ala e gaamai di Longo Humalia!”*

* **10.11:** Isaiah 28.16 * **10.13:** Joel 2.32 * **10.15:** Isaiah 52.7

16 Hagalee go digaula huogodoo nekae di Longo Humalia. Isaiah gu helekai, “Meenei Dimaadua, ma koai e hagadonu madau helekai?”*

17 Malaa, di hagadonu le e hidi mai i di longono nia helekai, gei nia helekai ne lloomoi i nia agoago o Christ.

18 Gei au ga heeu be di maa e donu digau Israel digi longono nia helekai agoago? Deesai, digaula gu longono, i di Beebaa Dabu e helekai: “Di lee o nadau helekai gu modoho gi hongo henuailala hagatau, gei nadau helekai guudau inia mada o henuailala.”*

19 Malaa, au ga heeu labelaa be di maa e donu digau Israel digi modongoohia di mee deenei? Ma go Moses modogoia dela ne helekai gi di maa matagidagi, “Au ga haga hai hegau tenua damana balumee gi heia agu daangada gi dubua; Au gaa hai tenua de kabemee gi heia agu daangada gi hagawelewele.”*

20 Gei Isaiah e helekai haga madammaa, “Au ne gida go digau ala hagalee nogo halahala Au. Au ne haga gida Au gi digau ala hagalee nogo heheeu Au.”*

21 Mee gu helekai i di hai o Israel, “Di laangi hagatau Au nogo holo gi daha ogu lima belee hagagahi mai digau de hagalongo ge e hai baahi mai gi di Au.”

* **10.16:** Isaiah 53.1 * **10.18:** Pisalem 19.4 * **10.19:** Deuteronomy 32.21 * **10.20:** Isaiah 65.1-2

11

Tumaalia God gi Israel

¹ Gei au ga heeu, God la gu de hiihai gi ana daangada donu? Deeai! Au tangada o Israel donu, di hagadili o Abraham, di madawaawa o Benjamin.*

² God digi de hiihai gi ana daangada ne hilihili matagidagi. Goodou gu iloo di Beebaa Dabu e haga modongoohia bolo Elijah ne dangi ang gi God e hai baahi ang gi digau Israel, boloo,

³ “Meenei Dimaadua, digaula gu dadaaligi gii mmade au soukohp, gu oho gi daha au gowaa hai tigidaumaha, ko au hua ne dubu i golo, gei digaula belee daaligi au gii made.”*

⁴ God ne helekai bolo aha gi mee? Ne helekai boloo, “Au ne benebene agu daangada e hidu mana (7,000)

ala digi daumaha ang gi di balu god go Baal.”*

⁵ Gei dolomeenei le e hai beelaa: Digau hogoohi loo e dubu i digau ala ne hilihili go God i dono dumaalia.

⁶ Di hilihili a Maa la ne hai i dono dumaalia dehuia, hagalee mai i nadau mee ala ne hai. Maa di hilihili a God la ne hai mai i nadau mee ala ne hai, gei tumaalia o Maa la hagalee tumaalia e donu.

⁷ Malaa e hai behee? Digau Israel la digi gidee nadau mee nogo halahala. Digau hua hogoohi ala ne hilihili go God ne gidee. Gei digau ala i golo la gu haga longoduli gi di gahigahi a God.

⁸ Di Beebaa Dabu e helekai,

* **11.1:** Philippians 3.5
1-Kings 19.18

* **11.3:** 1-Kings 19.10,14

* **11.4:**

“God gu haga bagege digaula.
Nadau golomada gu de gidee,
nadau dalinga gu de longono,
gaa dae mai loo gi dangi nei.”*

⁹ Gei David gu helekai,

“Nadau hagamiami gii hai di mee e hele ge kumi
digaula.

Digaula giitoo gilala ge giikae nadau hagd-
uadua!*

¹⁰ Nadau golomada gi dee gida,
gei digaula gii piga i lodo nadau haingadaa
i nia madagoaa huogodoo.”

¹¹ Au ga heeu: Di madagoaa digau o Jew
ne tingatinga, digaula guu too gu hagalee?
Deeai! Idimaa digaula guu hai di huaidu, gei
di haga mouli guu hana gi digau tuadimee belee
hai digau o Jew gi dubua.

¹² Di hala o digau o Jew la gu haga maluagina
henuailala. Di hagaloale o digau o Jew i baahi
di Hagataalunga, la guu hai digau tuadimee
gi maluagina huoloo. Malaa, di maluagina la koia
ga damana i di madagoaa di hulu o digau o Jew
ma ga dogomaalia!

Di haga mouli o digau tuadimee

¹³ Dolomeenei gei au e helekai adu gi goodou
digau tuadimee. Ilodo hua dogu madagoaa e hai
tangada agoago hagau ang gi digau tuadimee, gei
au e hagaamu i dogu ngalua.

¹⁴ Holongo au e mee di hai agu daangada donu o
Jew gi dubua gii mee di mouli hunu ginaadou.

* **11.8:** Deuteronomy 29.4; Isaiah 29.10 * **11.9:** Pisalem 69.22-23

15 Idimaa, di madagoaa dela ne kili digaula gi daha, nia hagadaumee a God la guu huli guu hai nia hoo hagaaloho ni Mee. Malaa, gaa hai beheer go di madagoaa dela ga haga heaga ai digaula? Gaa hai be di mouli ang gi digau mmade!

16 Maa di baahi palaawaa matagidagi la gaa wanga gi God, gei di palaawaa hagatau la ni Mee. Maa nia aga laagau la ga tigidaumaha ang gi God, gei nia manga laagau labelaa ni Mee.

17 Hunu manga o di laagau olib hagalabagau la gu hadihadi gi daha, gei nia manga laagau olib lodo geinga gu hagapuni ang gi tuaidina o di laagau hagalabagau deela. Goodou digau tuadimee e hai be nia manga o di laagau lodogeinga, ge dolomeenei, goodou gu buni anga gi digau o Jew, gu hai mee gi di mouli hagataalunga maaloo o digau o Jew.

18 Deela laa, goodou hudee haga balumee ina nia daangada ne hadihadi gi daha be nia manga laagau. Goodou e deeme di hagaamu goodou. Goodou e hai be di mangalaagau, deenei laa, goodou e deeme di haga mouli nia aga o di laagau. Nia agalaagau ala e haga mouli ana manga, aalaa go goodou.

19 Malaa, goodou ga helekai boloo, “Uaa, nia manga la ne hadihadi belee haga aadee au.”

20 Di mee deenei le e donu, digaula ne hadihadi gi daha, idimaa, digaula e de hagadonu, gei goodou enoho hua igolo idi godou hagadonu. Malaa, goodou hudee hagaamuina goodou, goodou gi mmaadagu.

21 God digi dumaalia ang gi digau o Jew ala e hai be nia mangalaagau donu. Gei goodou

e hagamaanadu bolo God ga dumaalia adu gi goodou?

²² Mmada gi di aloho modi hagawelewele o God. Mee e hagawelewele gi digau ala gu ihala, gei e aloho i goodou, maa goodou ga mouli gi muli ilodo dono manawa dumaalia. Maa goodou ga hagalee mouli beenei, gei goodou gaa hadi gi daha labelaa.

²³ Maa digau o Jew gaa kili gi daha nadau de hagadonu, digaula gaa dugu labelaa gi nadau lohongo i mua, idimaa, God e mee di hai di mee deelaa.

²⁴ Goodou digau tuadimee e hai be di manga laagau olib lodo geinga dela ne hadi gi daha, ga hai baahi ang gi di haganohonoho a God dela e hagatomo ana mee, ga haga puni ang gi di laagau olib hagalahagau ne hagatomo. Digau o Jew e hai be di laagau olib hagalahagau, e haingoochia huoloo gi God di haga puni labelaa digaula gi nadau lohongo ala ne hadihadi ai.

Tumaalia o God ang gi nia daangada huogodoo

²⁵ Ogu duaahina nei, di tonu e de iloo tangada igolo, au e hiihai bolo goodou gi iloo, gi de maanadu goodou bolo goodou e kabemee. Di manawa hamaaloo digau Israel la hagalee noho waalooloo, e noho hua haga balua gaa dae loo gi di hulu digau tuadimee ga dogomaalia, gaa hai nia dama ni God.

²⁶ Deenei di hai o digau Israel ga mouli ai, be di Beebaa Dabu e helekai,
 “Tangada Haga mouli ga hanimoi i Zion,
 ga daa gi daha nia hagadilinga huaidu huogodoo

i baahi nia hagdili o Jacob.*

²⁷ Au gaa hai dagu hagdaba gi digaula

i dogu madagoaa ma ga wwede nadau huaidu.”*

²⁸ Idimaa digau o Jew e de hiihai gi di Longo Humalia, digaula guu hai nia hagdamee ni God, mai i goodou go digau tuadimee. Idimaa digaula ne hilihili go God, digaula guu hai nia hoo hagdalo ni Mee, mai i nadau maadua mmaadua.

²⁹ Idimaa, God hgdalee huli dono manawa i ana daangada ne hilihili mo ne hga maluagina.

³⁰ Gei goodou digau tuadimee, goodou nogo de hgdalongo gi God imua, gei dolomeenei goodou guu kae tumaalia o God, i tee hgdalongo o digau o Jew.

³¹ Gei dela gdoo, idimaa mai tumaalia dehuia dela ne kae go goodou, digau o Jew gu de hgdalongo gi God dolomeenei, bolo gii mee ginaadou di kae labelaa tumaalia dehuia o God.

³² God gulawalawa nia daangada huogodoo mai i nadau de hgdalongo, bolo gii mee di hga maahede digaula huogodoo i dono dumaalia.

Hagaamuina a God

³³ Nia maluagina llauehe huoloo go nia maluagina a God! E lla huoloo go dono kabemee mo dono iloo! Ma koai e mee di hga modongoohia ana maanadu hilihili, ma koai e modongoohia ono ala?*

³⁴ Di Beebaa Dabu e helekai,
“Ma koai e iloo di hgdamaanadu Dimaadua?”

* **11.26:** Isaiah 59.20

* **11.27:** Jeremiah 31.33-34

* **11.33:**

Isaiah 55.8

Ma koai e mee di wanga ana helekai hagamaamaa gi Mee?*

³⁵ Ma koai ne wanga gi God dahi mee belee hai a God gii hui gi muli gi de Ia?''*

³⁶ Idimaa, nia mee huogodoo la ne hai go Mee, ge ne hai mai i Mee, ge ne hai ang gi Mee.*

Di madamada ang gi God gii hana hua beelaa. Amen.

12

Di mouli i lodo nnegau a God

¹ Deenei laa, ogu duaahina nei, idimaa tumaalia o God edamanaiee mai gi gidaadou, gei au edangidangi adu gi goodou gi wanga ina godou huaidina e hai tigidaumaha mouli, ge dabu, ge e haga tenetene di manawa o God, deenei di hai daumaha e donu belee hai go goodou.

² Goodou hudee kawee nia haihai henuailala, gei goodou dugu ang gi God gi huluhia godou lodo hagatau, gei goodou gaa mee di iloo di hiihai o God, di mee dela e humalia, gei e tene ginai Mee, gei e donu huoloo.

³ Idimaa, mai i tumaalia dehuia o God dela negaamai gidiau, au ehelekai adu gi goodou huogodoo gi hudee hagabaubau bolo goodou e aamua. Goodou hagabaubau gi donu, tangada nei mo tangada nei, gii bida hagadina eia gii tau anga gi di hagadonu dela ne wanga go God gi deia.

* **11.34:** Isaiah 40.13 * **11.35:** Job 41.11 * **11.36:** 1-Corinthians 8.6

4 Tuaidina e dahi e logo ono dudaginga, gei nia dudaginga aanei le e hai nadau hegau geegee.*

5 E hai gadoo be gidaadou: gidaadou e dogologo, gei gidaadou la tuaidina e dahi i tadau buni anga gi Christ, gei gidaadou huogodoo e haga puni, e hai be nia dudaginga dagidahi o tuaidina e dahi.

6 Gidaadou gi haga gila ina aga tadau duhongo hegau dagidahi ala etau anga gi tumaalia dehuia o God mai gi gidaadou. Maa goe dau duhongo hegau e helekai nnelekai a God, gei goe gi heia gitau anga gi di hagadonu dela e hai mee ginai goe.*

7 Maa goe dau duhongo hegau e hagamaamaa, goe e hai gi hagamaamaa. Maa goe tangada agoago, goe e hai gi agoago.

8 Maa goe dau duhongo hegau e hagamaaloo aga lodo nia daangada, gei goe gi heia. Maa goe ewanga au mee donu ginia daangada, gei goe gi heia giilogo. Maa goe o mogobuna dagi, gei goe gi ngalua giibeni. Maa goe e hai di humalia gi digau ala i golo, gei goe gi heia i di tenetene.

9 Di aloho le e hai gi hai donu hagatau. Ginagina i di huaidu. Haga mau ang gi di humalia.

10 Goodou gi hagadau aaloho be nia dama a Christ, gei gi hagamahi e hagadau hagalaamua i godou mehanga.

11 Ngaalua hagamahi, gei hudee hagatoo. Hai hegau manawa dahi ang gi Tagi.

12 Heia godou hagadagadagee gi haga tenetene goodou. Noho i di aumaalia

* **12.4:** 1-Corinthians 12.12 * **12.6:** 1-Corinthians 12.4-11

ilodo godou haingadaa, gei gidalodalo inia madagoaa huogodoo.

¹³ Wangaina godou mee gi godou duaahina dama a Christ ala e hagaloale, gei gi benebene inia nia daangada gee gi godou hale.

¹⁴ Dangi gi God gi hagahumalia ina digau ala e hagahuaidu goodou. Uaa, dangi gi Mee gi hagahumalia ina, hagalee hagahuaidu.*

¹⁵ Tenetene dalia digau ala e tenetene, dangi-dangi dalia digau ala e tangitangi.

¹⁶ Haga dahidaamee inia nia daangada huogodoo bedi mee e dahi. Hudee duguina goodou laa hongo nia daangada. Heia nnegau o di hila gi lala. Hudee hagabaubau bolo goodou digau kabemee.*

¹⁷ Maa tangada gu hai adu gi goodou di huaidu, hudee huia gi di huaidu. Heia go di mee dela e hai go nia daangada huogodoo bolo e humalia.

¹⁸ Heia nia mee huogodoo ala e mee di godou hai, gii noho goodou idi aumalia ibaahi nia daangada huogodoo.

¹⁹ Ogu ihoo hagaaloho, goodou hudee tala di hui gi di huaidu, duguina gaa hailaa go di hawelewele o God. Idimaa, di Beebaa Dabu e helekai,

“Dimaadua e helekai boloo,
‘Ko au dela e hui di huaidu,
Au gaa hui laa gi muli gi tangada.’ ”*

²⁰ Heia di hai dela e helekai di Beebaa Dabu boloo,
“Maa do hagadaumee le e hiigai,

* **12.14:** Matthew 5.44; Luke 6.28

* **12.16:** Proverbs 3.7

* **12.19:** Deuteronomy 32.35

haangai ina a mee.
 Maa mee e hieinu,
 haga inumia a mee,
 idimaa, ma gaa hai kooe beenei,
 gei goe ne hai a mee gi langaadia huoloo.”*

²¹ Hudee duguina gi di huaidu
 gi haga magedaa ina goe. Haga magedaa ina di
 huaidu gi di humalia.

13

Tuhongo hegau nia dagi tenuta

¹ Nia daangada huogodoo e hai gi daudali nia
 dagi tenuta, idimaa, nia mogobuna dagi laa daha
 mo tumaalia o God ai. Gei nia dagi dolomeenei,
 la nia dagi ni God ne dugu gi golo.

² Be koai e hai baahi gi tagi tenuta, geia
 e hai baahi gi di mee a God ne haga noho. Gei
 digau ala e hai baahi gi tagi tenuta, e bida hagi aga
 nadau ihala.

³ Digau ala e hai di humalia, la hagalee
 mmaadagu i tagi, gei digau ala e hai di huaidu le
 e mmaadagu. Maa goe e hiihai bolo gi de madagu
 i di tagi, heia nia mee ala e humalia, gei mee
 ga hagaamu goe,

⁴ idimaa, mee tangada hai hegau ni God belee
 hagahumalia goe. Malaa, maa goe gaa hai di
 huaidu, goe gi madagu i mee, idimaa, ono mogob-
 una hagaduadua dangada le e donu. Mee tan-
 gada hai hegau ni God, gei ono mogobuna i golo
 e hagaduadua digau ala e hai di huaidu.

* **12.20:** Proverbs 25.21-22

⁵ Deenei tadinga goodou e hai loo gi hagalongo gi tagi tenua, idimaa hagalee mai di hagaduadua a God, gei mai i godou manawa madammaa.

⁶ Deenei tadinga labelaa di godou hui nia dagitedi, idimaa, nia waawa o nia dagi le e ngalua gi God.*

⁷ Huia laa godou boibana gi digaula. Huia gi digaula godou dagitedi donu mono dagitedi goloo, hagalabagau ina mo di hagalaamua digaula huogodoo.

Nnegau mehanga daangada

⁸ Hudee hai boibana ang gi dahi dangada, di boibana hua e dahi dela gi heia, gi hagadau aloho i godou mehanga. Be koai e hai beenei, la gu daudali nnaganoho.

⁹ Nia haganoho e helekai boloo,
 “Hudee mouli hai be di manu,
 hudee daaligi tangada gii made,
 hudee gaiaa,
 hudee hagagailaa.”

Nnaganoho huogodoo aanei mono haganoho ala i golo, le e daabui mai go taganoho e dahi:

“Aloho i tangada dela i do baahi,
 gii hai be do aloho i di goe.”*

¹⁰ Maa goe e aloho i tangada, dau hala e hai gi mee ai. Tangada ma ga aloho, la gu daudali nnaganoho hagatau.

¹¹ Goodou e hai gii hai di mee deenei, idimaa, goodou e iloo bolo di madagoaa belee

* **13.6:** Matthew 22.21; Mark 12.17; Luke 20.25 * **13.9:** Exodus 20.13-15,17; Deuteronomy 5.17-19,21; Leviticus 19.18

aala aga iei goodou, la deenei gu dau mai.
 Idimaa, dolomeenei tadau haga mouli
 la gu mada hoo hoo mai i tadau hagadonu
 matagidagi.

¹² Di boo gu hoo hoo gaalawa, di aa
 la gu hoo hoo mai. Gidaadou gaa dugu nia mee o di
 bouli, ga dahi aga nia goloo e heebagi ai gidaadou
 i lodo di maalama.

¹³ Heia gidaadou gingalungalua humalia,
 gadoo be nia daangada e noho i lodo di maalama
 o di aa, hagalee gai tagaao, hagalee mouli huaidu
 be di mouli hai be di manu, hagalee heebagi, be
 e dubua.

¹⁴ Gei goodou dahi aga ina nia goloo heebagi o
 tadau Dagi go Jesus Christ, dugu ina godou man-
 awa huaidu i di godou daudali di hiihai o tuaidina.

14

Hudee hagi aga ina do duaahina

¹ Benebene ina tangada dela e bagege dono ha-
 gadonu. Hudee hai baahi gi nia maanadu a maa.*

² Di hagadonu o tangada e hai a mee
 gi miami noo, gei tangada dela e bagege dono
 hagadonu, le e gai hua nia huwa laagau.

³ Tangada dela e miami noo, hudee de hiihai gi
 tangada dela e hilihili ana mee gai. Tangada dela
 e gai hua nia huwa laagau, hudee hagi aga ina
 tangada dela e miami hua noo idimaa, God
 e donu hua gi mee.

⁴ Goe koai dela bolo goe e hagi aga di hege o tuai
 dangada? Di tagi donu o maa dela e iloo be mee

* **14.1:** Colossians 2.16

e gila be hagalee gila. Gei mee ga gila laa, idimaa, Tagi le e mee di hai a mee gii gila.

⁵ Dahi dangada e hagamaanadu bolo di laangi igolo e mada hagalabagau ihunu laangi. Tuai dangada igolo e hagamaanadu bolo nia laangi huogodoo le e hai be di mee e dahi. Tangada nei mo tangada nei gii bida hagamaanadu ina di mee dela e humalia, ga daudali.

⁶ Tangada dela e hagalabagau di laangi e dahi laa hongo nia laangi ala igolo, le e hagalaamua Tagi. Tangada dela emiami hua noo, le e hagalaamua Tagi, idimaa, mee e danggee ang gi God i nia meegai. Tangada dela e hilihili meegai, le e hagalaamua Tagi, mee e danggee ang gi God.

⁷ Deai tangada i gidaadou e bida mouli i deia ai, ge deai tangada i gidaadou e bida made hua ang gi deia ai.

⁸ Maa gidaadou e mouli, go Tagi dela e mouli ginai gidaadou. Maa gidaadou e mmade, go Tagi dela e mmade ginai gidaadou. Maa gidaadou e mouli be e mmade, gidaadou nia daangada ni Tagi.

⁹ Idimaa, Christ ne made, ga mouli aga belee hai di Tagi ni digau mouli mo digau mmade.

¹⁰ Goodou ala egai hua nia huwalaagau, goodou e aha ala e hagi aga godou duaahina? Gei goodou ala e gai nia mee huogodoo, goodou e aha ala e hagahuaidu godou duaahina? Gidaadou huogodoo la gaatuu imua o God e hagiaga go Mee.*

¹¹ Idimaa, di Beebaa Dabu e helekai, “Dimaadua e helekai boloo:

* **14.10:** 2-Corinthians 5.10

‘Au go di God Mouli,
nia daangada huogodoo ga dogoduli i ogu mua,
ga haga modongoohia aga bolo Au go God.’ ”*

¹² Deenei laa, tangada nei mo tangada nei i gidaadou le e hai gi hagi aga gi God di hai o dono mouli.

Hudee heia godou duaahina gii tinga

¹³ Malaa gidaadou gaa dugu tadau hagadau hagi aga gidaadou. Goodou hilihilia di mee dela e hagalee hai godou duaahina gii tinga, be gii too gi lodo di huaidu.

¹⁴ Dogu buni anga gi tadau Dagi go Jesus Christ, le e hai au gi iloo bolo nia meegai e gulugulua ai, gei maa iai tangada i golo e hai bolo nia meegai aanei e gulugulua, nia meegai aanei le e gulugulua hua ang gi tangada deela.

¹⁵ Maa goe ga haga manawa gee do duaahina i au mee ala e gai, malaa, goe guu hai be tangada do aloho ai. Goe hudee dumaalia gi au mee ala e gai gi hagahuaidu ina tangada dela ne made ginai a Christ.

¹⁶ Goodou hudee haga ingoo ina di humalia gi di huaidu.

¹⁷ Idimaa, Teenua King o God la hagalee go nia mee e gai mono mee ala e inu, gei go di tonu, di aumaalia mo di tenetene mai di Hagataalunga Dabu.

¹⁸ Maa tangada e hai hegau gi Christ i di ala beenei, geia e haga tenetene di manawa o God, gei e donu ginai nia daangada ala i golo.

¹⁹ Malaa, gidaadou gi hagamahi i nia madagoaa huogodoo gi nia mee ala e hai gidaadou gii noho

* **14.11:** Isaiah 45.23

i di aumaalia, gei e hagadau hagamaaloo aga gidaadou.

²⁰ Goodou hudee oho ina nia mee a God ne hai i di gili nia meegai. Gidaadou e humalia e gai nia mee huogodoo, malaa e huaidu go tangada dela ma gaa gai nia mee ala e hai ono ehoo gii too gi lodo di hala.

²¹ Di mee dela e donu di hai le hagalee gai nia goneiga, hagalee inu nia waini, hagalee hai di ingoo hua di mee dela e hai godou duaahina gii too gi lodo di huaidu.

²² Daahia hua au mee ala ne hagadonu i di gili nia mee aanei igulu mehanga mo God. E maluagina go tangada dela hagalee hagahuaidu ia gi ana mee ala e hai bolo e donu.

²³ Maa tangada e manawa lua i ana mee e gai, God ga hagiaga a mee, idimaa, di haihai o tangada deela la hagalee ne mau mai i di hagadonu. Nia mee huogodoo ala hagalee mau mai i di hagadonu, la di huaidu.

15

Haga tenetene digau ala igolo, hagalee go goodou hua

¹ Gidaadou ala emaaloo tadau hagadonu, gidaadou e hailoo gi hagamaamaa digau ala e paagege e aamo nadau mee daamaha. Gidaadou hudee haga tenetene ina hua gidaadou.

² Gei gidaadou huogodoo gi heia nia mee humalia ang gi tadau duaahina, e haga tomo aga digaula i lodo nadau hagadonu.

³ Idimaa, Christ hagalee ne haga tenetene Ia. Di Beebaa Dabu e helekai,

“Ma ko Au dela ne hagahuaidu go nia daangada ala ne hagahuaidu goe.”*

⁴ Idimaa, nia mee huogodoo ala guu lawa di hihi gi lodo di Beebaa Dabu, la ne hihi belee aago gi daadou gi hai mee gi di hagadagadagagee mai i tatau hagakono mo di hagamaaloo aga tatau lodo mai i di Beebaa Dabu.

⁵ God go taamada o di manawa hagakono, mo di hagamaaloo di manawa, gi gowadu gi goodou di manawa buni i godou daudali a Jesus Christ,

⁶ gei goodou gii dahi i di hagaamu a God Tamana o tatau Dagi go Jesus Christ mai i di lee e dahi.

Di Longo Humalia ang gi digau tuadimee

⁷ Goodou hagadau hila anga igoodou bolo gi gila ai di madamada o God, gadoo be Christ dela ne hila adu gi goodou.

⁸ Idimaa, au ehagiadu gi goodou bolo Christ guuhai di hege ni digau o Jew belee haga modongoohia di tonu o God, gei e haga gila aga nia hagababa a God ala ne hai gi natau maadua mmaadua,

⁹ gei e hai digau tuadimee gii mee di hagaamu tumaalia o God labelaa. Be di Beebaa Dabu dela e helekai,

“Au ga haga hagaamu Goe i lodo digau tuadimee, au ga dadaahili mo di hagaamu do ingoo.”*

¹⁰ Di Beebaa Dabu e helekai labelaa,

“Goodou digau tuadimee, goodou madalia nia dama a God, tenetene haga hagaamuina.”*

* **15.3:** Pisalem 69.9 * **15.9:** 2-Samuel 22.50; Pisalem 18.49

* **15.10:** Deuteronomy 32.43

11 Gei e helekai labelaa,
 “Goodou go digau tuadimee huogodoo,
 goodou hagaamuina Dimaadua.
 Goodou huogodoo, hagaamuina a Mee.”*

12 Isaiah gu helekai,
 “Tangada i di hagadili o Jesse ga gila aga,
 e dagi digau tuadimee,
 gei digaula ga hagadagadagee gi Mee.”*

13 Malaa, God dela go taamada o nia hagadagadagee huogodoo, gi haga honu ina goodou ginia hagadilinga tenetene huogodoo mo di aumaalia mai i di godou hagadonu a Mee, bolo gi tomo aga di godou hagadagadagee inia mahi o di Hagataalunga Dabu.

Tadinga di hagamaha o Paul i lodo dana lede

14 Ogu duaahina nei, au guiloo bolo goodou gu haga honu ginia hagadilinga humalia huogodoo, gu hai mee ginia kabemee huogodoo, gei guu mee di hagadau aago i goodou.

15 Gei ilodo di lede deenei, au gu hagamaha e haga madammaa nia mee ala ne haga langahia adu gi goodou. Au e hagamaha adu gi goodou i tumaalia o God dela ne gaamai gi di au,

16 gaa haiiei au tangada haihegau ni Jesus Christ e hai ana hegau ibaahi digau tuadimee. Au e haihegau gi Mee be tangada hai meedabu, i dagu hai agoago i di Longo Humalia mai baahi o God bolo gii mee ai digau tuadimee di hai tigi-daumaha dela e tene ginai di manawa a God, go

* 15.11: Pisalem 117.1 * 15.12: Isaiah 11.10

digau ala ne hagamahi go di Hagataalunga Dabu gi Mee.

¹⁷ I dogu buni anga gi Jesus Christ, au e helekai hagaamu au bolo au tangada hai hegau ni God.

¹⁸ Au e hagamahi, e helekai hua nia mee a Christ ne hagamahi aga i dogu baahi belee daga mai digau tuadimee gii hai digau e hagalongo gi God, mai i agu agoago mo di hai hegau gi nia maa,

¹⁹ mai baahi nia mogobuna mono mee haga goboina, mo mai baahi di mogobuna o di Hagataalunga o God. Daamada mai i dogu heehee mai i Jerusalem, gaa tugi i Illyricum, au gu hagadele di Longo Humalia a Jesus Christ gi nia gowaa huogodoo.

²⁰ Au gu hagamahi i nia madagoaa huogodoo bolo gii mee au di hagadele di Longo Humalia gi nia gowaa huogodoo ala digi longono ginaadou a Christ, bolo gi de haga duu aga hua di Longo Humalia i hongo di hagamahi dela ne hai go tuai dangada.

²¹ Di Beebaa Dabu e helekai,
 “Digau ala digi hagianga ginai di hai o Maa ga gidee,
 digau ala digi longono, ga modongoohia.”*

Di hagamahi a Paul e heetugi gi Rome

²² Di mee deenei dela e haga deadee au i nia madagoaa e logo belee heetugi adu gi goodou,*

²³ gei dolomeenei daga moomee i nia gowaa aane i la guu lawa. I lodo nia ngadau e logo, au nogo hiihai bolo e hanadu gi godou baahi.

* 15.21: Isaiah 52.15 * 15.22: Romans 1.13

²⁴ Gei au e hagadagadagagee bolo au ga hanadu gi godou baahi dolomeenei, i dogu hana gi Spain. Au e hiihai e heetugi adu gi goodou, gei i muli dogu noho i godou baahi, gei au e hiihai bolo goodou gi hagamaamaa ina au i dogu hagatanga i godou baahi e hana gi Spain.

²⁵ Dolomeenei, gei au e hana gi Jerusalem, e hagamaamaa nia daangada a God ala i golo.*

²⁶ Idimaa, nia nohongo dabu ala i Macedonia mo Achaia guu bida hiihai bolo e hai tigidaumaha, e hagamaamaa digau hagaloale ala ilodo nia daangada a God i Jerusalem.

²⁷ Digaula hua ne hiihai gi tigidaumaha deenei, gei nadau hegau la ne belee hagamaamaa digaula. Idimaa digau o Jew gu hagamaamaa digau tuadimee ginia maluagina mai i baahi di Hagataalunga, deelaalaa, digau tuadimee gi hagamaamaa ina digau o Jew mai i nadau maluagina o henuailala.*

²⁸ I dogu madagoaa ga haga lawa dagu moomee gaa wanga gi digaula nia bahihadu huogodoo ala ne hagabudu, gei au ga hagatanga, gaa hana gi Spain, ga heetugi adu gi goodou i dogu hana.

²⁹ Malaa, i dogu madagoaa ma ga hanadu gi godou baahi, gei au e iloo bolo au e hanadu mo nia haga maluagina logowaahee a Christ.

³⁰ Ogu duaahina nei, au e dangi adu gi goodou, hagamahi i di ingoo o Jesus Christ, tadau Dagi, mo mai i di aloho dela mai baahi o di Hagataalunga, bolo goodou gi hagamahi haidalodalo gi God i di au.

* 15.25: 1-Corinthians 16.1-4 * 15.27: 1-Corinthians 9.11

³¹ Goodou dalodalo idiau gibenebeneina au gidaha mo digau de hagadonu ala i Judea, giihai dagu moomee dela i Jerusalem di mee e haga tenetene nia dama a God.

³² Maa God ga dumaalia mai gi gidaadou, gei au ga hanadu gi godou baahi ilodo di tenetene, ga hagamolooloo i godou baahi idi madagoaa dului.

³³ God dela go taamada o di aumaalia gii noho i godou baahi huogodoo. Amen.

16

Taga aloho a Paul

¹ Au e haga modongoohia adu gi goodou tadau duaahina ahina go Phoebe dela e hai hegau i di nohongo dabu i Cenchreae.

² Benebene ina a mee i di ingoo o Tagi, be di hai o nia dama a God, gei gi hagamaamaa ina a mee i ana mee ala e hiihai ginai, idimaa, mee tangada e humalia ang gi ono ehoo dogologo dalia au.

³ Heia laa dagu hagaaloho gi Priscilla mo Aquila, go ogu ihoo hai hegau gi Jesus Christ,*

⁴ ala gu de hagahuodia nau mouli i di au. Au e danggee gi meemaa, hagalee ko au hua, gei nia nohongo dabu digau tuadimee huogodoo ala i golo labelaa.

⁵ Dagu hagaaloho labelaa anggi nia gau daumaha ala e dagadagabuli i di nau hale.

Dagu hagaaloho ang gi dogu ihoo hagaaloho go Epaenetus, tangada ne daamada ne hagadonu a Christ i Asia.

* **16.3:** Acts 18.2

⁶ Dagu hagaaloho ang gi Mary dela nogo ngalua hagamahi adu gi goodou.

⁷ Dagu hagaaloho labelaa ang gi Andronicus mo Junias, nia daangada o Jew ala nogo i gimaadou i lodo di hale galabudi. Meemaa guu hai nia daangada e modongoochia ai digau agoago hagau, gei meemaa guu hai nia dama a Christ mai hua i ogu mua.

⁸ Dagu hagaaloho ang gi Ampliatus, dogu ihoo i mau hagadaubuni ang gi Tagi.

⁹ Dagu hagaaloho ang gi Urbanus, tadau ihoo hai hegau gi Christ, mo Stachys, go dogu ihoo hagaaloho.

¹⁰ Dagu hagaaloho ang gi Appeles dela guu donu dono hai hegau gi Christ.

Dagu hagaaloho ang gi digau di hale o Aristobulus.

¹¹ Dagu hagaaloho ang gi Herodion, tangada o Jew labelaa mo nia dama a Christ i di hale o Narcissus.

¹² Dagu hagaaloho ang gi Tryphaena mo Tryphosa nia ahina ala nogo hai hegau i nia hegau a Tagi, mo ang gi dogu ihoo hagaaloho go Persis dela gu ngalua hagamahi i nau buni anga gi Tagi.

¹³ Dagu hagaaloho ang gi Rufus, tangada hai hegau humalia huoloo ang gi Tagi, mo dono dinana dela nogo benebene au be tama daane donu ni aana.*

¹⁴ Dagu hagaaloho ang gi Asyncritus, Phlegon, Hermes, Patrobas, Hermas mo tadau duaahina huogodoo ala i nadau baahi.

* **16.13:** Mark 15.21

15 Dagu hagaaloho ang gi Philologus mo Julia, mo ang gi Nereus mo dono duaahina ahina, mo ang gi Olympas mo nia dama huogodoo a God ala i nadau baahi.

16 Goodou gi hagadau hagaaloho i godou mehanga gi di hagaaloho onia dama a Christ. Nia nohongo dabu huogodoo a Christ e hagau adu nadau hagaaloho.

Nia aago haga muliagina

17 Ogu duaahina nei, au e hagamaaloo aga goodou bolo giipula i digau ala e hai goodou gi waewae, e hagahuaidu nia hagonu o nia daangada, ge e hai baahi gi godou mee ala gu agoago ai. Haga ligaliga i daha mo digaula!

18 Digau ala e hai hegau beenei, la hagalee hai hegau donu gi Jesus Christ tadau Dagi, e hai hua go nadau hiihai. Digaula e halahalau nia hagamaanadu o digau ala e hai di tonu gi nadau helekai humalia mo nadau helekai tilikai.

19 Digau huogodoo gu longono di godou maaloo di haga gila aga di Longo Humalia, dela gaa hidi ai iei au ga tenetene adu gi goodou. Au e hiihai bolo goodou gi kabemee gi nia mee humalia, ge hudee kabemee gi nia mee huaidu.

20 Gei God dela go taamada odi aumaalia, ga limalima di dugu eia Setan gilala godou babaawae gi dagadagahia.

Tumaalia o tadau Dagi go Jesus gi madalia goodou.

21 Timothy go dogu ihoo haihegau, mo Lucius, Jason, mo Sosipater aalaa go digau o Jew, e hagau adu nadau hagaaloho.*

22 Au, go Tertius, tangada dela ne hihi di lede deenei, e hagau adu gi goodou dagu hagaaloho dama a Christ.

23 Dogu ihoo go Gaius, dela enohoei au i dono baahi, dono hale dela e dagadagabuli ai gi-maadou, e hai labelaa dana hagaaloho adu gi goodou.*

Erastus, go tangada benebene mee di guongo deenei, mo tadau ihoo hagaaloho go Quartus, meemaa e hai nau hagaaloho adu gi goodou.

24 [Tumaalia o tadau Dagi go Jesus Christ gi madalia goodou huogodoo gaa hana hua beelaa. Amen]

Talodalo hagaamu haga muliagina

25 Gidaadou huogodoo gi hagaamuina a God. Ma go Mee hua dela e mogobuna i dana haga mau goodou ilodo godou hagadonu, e haga modongoohia go di Longo Humalia dela e agoago ko au idi hai o Jesus Christ, modi haga modongoohia di tonu deiloo dela nogo ngala waalooloo mai mua.

26 Gei dolomeenei di tonu deela la gu dugu mai gi di maalama mai nia beebaa onia soukohp, ge mai nia helekai a God. Di tonu deenei la gu haga modongoohia ginia henua llauehe huogodoo, bolo huogodoo gi hagadonu gi daudalia.

* **16.21:** Acts 16.1 * **16.23:** Acts 19.29; 1-Corinthians 1.14; 2-Timothy 4.20

²⁷ Gidaadou gi hagaamuina a God, go Mee hua modogoia e kabemee, ono madamada mai i Jesus Christ gii hana hua beelaa. Amen.

Beebaa Dabu
The Holy Bible in the Kapingamarangi language of the
Federated States of Micronesia, spoken on the
Kapingamarangi and Ponape islands, Caroline Islands

Copyright © 1996, 2014 The Kapingamarangi Bible translation committee

Language: Kapingamarangi

Translation by: The Kapingamarangi Bible translation committee

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-04-24

PDF generated using Haiola and XeLaTeX on 18 Apr 2025 from source files dated 31 Aug 2023

28201f3a-53b9-559a-9b49-00a6f40bcb2a